



文苑英華卷第五百六十三

賀祥瑞三

賀連理樹表一首

賀皇太子瑞木表一首

爲納言姚壽等賀瑞桃表一首

爲宰相賀連木表一首

爲宰相賀李樹凌冬結實表一首

中書門下賀許州連理棠樹

皇太子賀芝草表一首

爲宰相賀合煉院產芝草表一首

代百官賀芝草表一首

中書門下賀芝草嘉禾表一首

中書門下賀芝草表一首

皇太子賀嘉麥表一首

中書門下賀恒華州嘉禾合穗表一首

賀嘉禾表一首

為百官賀千葉瑞蓮表一首

中書門下賀神龍寺渠中瑞蓮表一首

賀西內嘉蓮表一首

為百寮賀瑞筍表一首

為朝官及岳牧賀慈竹再生表

賀連理棠樹合歡瓜白兔表一首

賀連理樹表

關丘均

臣聞靈氣所生恒起於無形祥跡所憑名屬於聖日雖微

物之成象固王者之明徵臣所部官園中有李樹質茂宗

生異標恒類交枝兩出共理三連綠葉密而泛烟白花糝

而似雪觀於即事此句疑知者稱瑞當今星精下流天意玄

寄往一作嘉圖誰載休徵莫儔昔上林樹生中興劉氏推神

議物我則居多臣諤齒勞疑章慙名首席欣逢偶數竊躍

昌期

皇太子賀瑞木表高宗

崔融

臣某言臣聞惟德動天無遠而不格惟神感物有來而必

應伏惟天皇提乾象運斗柄載黃屋而臨太階正紫宮而

開列室伏見某官奏稱石門玄谷內玉山宮側秋水一作暴長漂木三萬餘根林衡悚迫匠人驚視仙桂來於月中靈查下於天上昔開陽門之肇建飛柱潛移太極殿之初營浮梁遠至論其壯觀猶尺燼之窺尋本喻以皇家若牛涿之望鰲海方見凌雲之構匪日而成負黼衣而朝百神垂衣裳而會萬國盛矣美矣輪馬與馬臣德謝元良濫膺儲貳寢門來謁常取候於鳴鷄大厦既成竊自歡於賀雀不任鳧藻之至謹遣某官某奉表稱賀

為納言姚璿等賀瑞桃表

李嶠

臣某等言伏見內出靈桃四實共同一帶禁園方果仙庭奇樹名珍杏柰族茂櫻胡鮮花發於上春嘉實成於早夏

四而為一表四夷之一君異而為同明異才之同貫漢官臣番核魯所未窺衛國報瓊何能竊似殊祥靈應疊貺駢臻凡在見聞孰不歡躍臣等謬當樞近累覲休符喜抃之情實萬恒品無任欣慶之至謹奉表陳賀以聞

為宰相賀連理木表

常衮

臣言今月二十六日得太清宮道士陳岳等狀稱聖祖殿院東廊九靈門北有柰樹連理異枝還合者臣按漢武元符元年得奇木枝旁出輒後數日越地及匈奴率眾來降者中興書云王者德澤純洽八方大同則木連理伏惟皇帝陛下體元以臨寶位法道以御太和孝通神明故祖宗提福德合天地則草木呈祥至孝所感生靈遂性湛恩既

溥異類懷仁大告休期累彰嘉瑞况我祖太清別殿奇樹
効珍連理雙莖混成一體其同本也所以煩於衆枝其附
內也所以慶於無外必有削枉之類亦表其強幹之休天
下一家本支百代稽於圖傳可以明徵聖敬所臨神心允
答不然豈獨秀不遷之廟增華太素之宮曲折合符精靈
相會耿光丕貺高映古今臣媿無黃老之術謬贊清虛之
化獲奉休異喜萬恒情望請宣付史官編之簡冊無任欣
抃之至謹奉表陳賀以聞臣某誠歡誠慶頓首頓首

為宰相賀李樹凌冬結實表

孫逖

臣等伏見劉麟奏南郡李樹凌冬結實并圖及李實者惟
此珍樹名應皇族玄元所指用興長發之祥明靈是憑故
表非常之瑞已經夏實更發冬榮霜雪而翠葉不凋斯瀟
而朱實皆就仁及草木既叶太平之期道貴生成仍呈久
視之應恭惟聖感詎可名言所以彰寶祚之靈長表天枝
之碩茂遠踰海嶠來薦闕庭豈三秀之足稱何兩岐之敢
喻殊祥荐至品物同歡况在臣等寧勝抃躍無任欣慶之
至謹奉表陳賀以聞

中書門下賀許州連理棠樹表

德宗

權德輿

臣某等言今月中使某乙至奉宣進止示臣等許州觀察
使上官說所奏許州長社縣嘉禾鄉合穗村連理棠樹一
株者謹按孝經援神契曰王者德及草木則木連理伏惟
陛下聖澤玄功浹洽生類故天休滋至地產交感亭育變

化發為百祥珍木敷榮異根合幹表茲植物以瑞康時况
嘉禾名地已同唐叔之獻其棠挺秀寧比郡南之什芬芳
連理遐邇叶心叢滋慶祉昭煥圖籍臣等謬忝鼎鼐喜萬
恒情無任欣抃踴躍之至謹奉表陳賀以聞貞元八年四月一日

皇太子賀芝草表

高宗

崔融

臣某言伏承某月日芝草生於乾元殿瑞命天來符祥日
至煌煌三秀分芰一作藻井而攢柯曄曄九光間梅梁而吐
葉晉都宮閣何必靈芝之臺洛邑山川居然密芝之地賀中
伏惟天皇天臨海內帝有城中兼漢制而宅兩京用堯心
而加百姓神精下降洽至道於丘陵靈液旁霑被深仁於
草木觀其如蓋如閣一作爲如日如星得五方之氣象合

四時之景色仙人在上則車馬疑飛神龍居下則風雲不

去謂蓬瀛之海列

一作到

即崑閬之山開魏皇之雙幹莫儔

漢帝之九莖為劣可以薦郊廟可以觴公卿

臣

謬踐儲闈

祇膺守國不獲親承左右日覽休徵雖玉脛逆

疑作延

齡在

神仙而可致而方

疑作乃

圭入膳視朝夕而猶賒是用心馳

仁壽之前慶集肅成之下無任抃躍之至謹遣某官某奉

表稱賀

皇太子賀天后芝草表

前人

臣某言

臣

闡德合天地仁之所及也深道貫神明孝之所

寘也極故有玄功勝蠶靈命氤氳瑤光發辰象之精金色
吐陰陽之秀伏惟天后化含萬物訓正六宮天下被塗山

之音海內仰河洲之教今月某日使其至伏承芝草生於
東都太原守舍利塔屋下芝英繞殿甃疑王母之臺芝草
成田聊比宓妃之館其帶紫其莖白露霏霏雨露之津搖動
風雲之氣斜臨網樹分貝葉而重開近對淪池接蓮花而
倒下豈與夫生于石室空傳好道之言產自珠宮徒事不
經之說可同年而語哉臣 監承天祚多慙國本始欽玄澗
之祥更喜黃雲之地頌聲無輟在郊廟而方傳御膳有憑
俯神仙而何遠臣 子之慶倍百恒情無任欣忭之至

為宰相賀合鍊院產芝草表

孫逖

臣 等伏見道士黃河清等奏興慶宮合鍊院內產芝草五
色分輝六莖
神丹入鍊而轉精禎祥應期以如答觀

茲嘉瑞望宣付史官者伏以靈芝所致和氣之精著羨仙
經標名瑞典陛下深仁契道至德通神鍊液飛丹既啓長
年之館敷華有葉遽呈三秀之祥五色有類於卿雲六莖
且符於帝樂豈唯動植昭感以表於休徵固亦真仙叶應
用彰於聖壽臣 等忝侍軒陛倍深慶悅無任抃躍之至謹
奉表陳賀以聞

代百官賀芝草表

獨孤及

臣 某等言伏見開府儀同三司魚朝恩奏含暉院及白華

亭院內並芝草生者臣 等謹按圖謀集作謹披 竊考前典

集作 蓋王者以道蒞天下而德及庶物則有靈木神草集

志集作 靈草儲祉集作 効異陛下賢聖恭儉慈仁愛人開闡學校

靈草儲祉集作 効異陛下賢聖恭儉慈仁愛人開闡學校

尊教勸德將以五經根本庶政風化所浹神人以和和氣
旁達感蒸為瑞集作和氣傍感蒸而為瑞不然豈靈芝茵蠢異處同植

不產他宇必於宸居曄曄九葩之蓋煌煌三秀之質蓋表
陛下之欽明光宅以人文成化靈根碩茂萬葉無疆神應
炳然天意如答臣等獲忝朝列幸覩楨祥云

中書門下賀芝草嘉禾表

常袞

臣等言伏見兵部尚書中書門下平事李抱玉進芝草嘉
禾者臣聞王者道洽則靈芝生天下和一則嘉禾應伏惟
陛下誕膺景命憂濟生靈合太上之德感元精之氣天地
氤氲神明滋液降此珍物叶於昌期垂蓋連莖三華煥發
離根合穎一穗孤秀沐我渥澤扇其祥風衆草之英百

之長以兆稔歲以符太平昔周得唐郊之獻列篇於典策
漢獲甘泉之祉薦歌於清廟三瑞之極一朝會同長發其
祥無疆之慶臣等謬忝近侍幸觀休祥喜抃之情倍萬恒
品無任歡抃之至

中書門下賀芝草表

前人

臣某言今日中使吳承一作清至宣示宋汴節度使御史
大夫田神功所獻芝草一株紫蓋黃莖叢生者天生神物
王者嘉瑞奇秀之狀靈篇未書伏惟陛下孝通神明德至
草木和氣所感禎祥屢彰煌煌靈芝郡國來獻垂以金蓋
發其瓊葩爛然紫雲之色灼然紅蕖之秀王德斯應皇家
永昌固可寫狀圖謀薦于郊廟祗奉天意贊揚鴻休臣等

獲觀殊祥喜倍恒品無任慶抃之至

皇太子賀嘉麥表

崔融

臣某言伏見雍州司馬徐慶稱所部有嘉麥一莖六穗纖
茫濯露疑因黑壤之宜香稼搖風若吐黃金之色豈非靈
心昭應睿德感通降之自天何必來麩之詠嘗之干廟先
符孟夏之時凡在含生相趨動色臣謬當居守肅奉宗桃
一穗兩岐徒說張君之詠十畝千石方輕范氏之書仰天
意而增歡顧人心而載躍無任喜抃之至謹附起居使某
官某奉表陳賀以聞

中書門下賀恒華州嘉禾合穗表

德宗

權德輿

臣等某言伏見武俊所奏恒州鼓城縣生嘉禾一本合穗

又盧徵奏華州鄭縣太平鄉三交里獲嘉禾一穗者謹按
孫氏瑞應圖曰嘉禾者五穀之長長者德茂則生伏惟陛
下德叶玄功仁育生類同穎擢秀殊祥並時昔周道既昌
唐叔以獻表天下和平之兆為陰陽訢合之符五穀登成
百嘉儲祉發於厚載集是休徵况徽鎮之方表章繼至感
通昭晰莫甚於斯臣等忝列台司喜倍恒品無任欣抃踴
躍之至謹奉表陳賀以聞臣某等誠歡誠喜頓首頓首謹
言貞元十五年
九月七日

賀嘉禾表

張仲素

臣某等言今月某日伏見平盧淄青等州節度使鄆州大
都督府東平縣官莊地内有禾異瓏雙本合成一穗蓋圖

李子

奏進傳示百僚者臣等中謹按瑞應圖曰王者德茂而太平君臣和則嘉禾朱草以中萌言不得中和之氣即不生也伏惟陛下鼓和風茂休德泰階平於上下大中建於人臣神明是若徵兆必報通彼殊寵摠其雙莖滋大澤以冥造成嘉穗而薦和合為一彰至化之會同堅而好表資生之豐實推物類以得天意觀繪事而擬靈篇凡在班行咸同慶幸不勝云

為百官賀千葉瑞蓮表武后

崔融

臣某等文武官若干人言伏奉恩旨垂示臣等千葉瑞蓮觀其綠裏紅葩細莖素蓋露搖珠點霞圻金鬚百星交映羽蓋張而一色萬目齊明軍輪合而千狀謂翔鸞之欲舞

若群鶴之並飛峯形聳而半天石勢蹲而臨海冲氣積其下惠風流其上服之可以登仙採之可以駐壽雖復釋梵天王之國千影離婁善住天子之地雙輝燦爛校之今日未可同年臣等謹按華嚴經云蓮花世界是廬舍即佛成道之國一蓮花有百億國無量清淨經云無量清淨佛七寶池中生蓮花上夫蓮花者出塵離染清淨無瑕有以見如來之心有以察如來之法道之行也會不徒然伏惟天冊寶金輪聖神皇帝現此妙身當茲巨瑞符契冥合影響不差有百億國無量清淨者天意若曰護蘇蟻結默啜蜂飛聞鼓鞞而革面望旌旗而懸首指麾而邊境獲安高枕而中國無事風行電掃納嘒類於百億之區霧廓塵銷反

遊魂於清淨之域深仁所及不亦弘哉臣等濫奉朝恩親披瑞謀非常之貺曠古未聞殊特之珍歷代一見手舞足蹈倍百常情無任慶躍之至謹詣朝堂奉表陳賀以聞

中書門下賀神龍寺渠中瑞蓮表德宗 權德輿

臣某等言今日中使某至奉宣進止示臣等神龍寺殿前

渠中瑞蓮花圖其花一莖兩房者伏惟陛下仁聖感通弘被生植宥萬方之暇必順天心於九重之中別開佛刹緬緼降祉菡萏敷榮瑞茲灼灼之花迴出田田之葉吉祥殿外芳集作芬馥殊常功德池中光華交映扶踈發越並秀相鮮玄功嘉應超冠圖謀彼芝之稱三秀麥有兩岐雖驗休祥豈階妙法觀雙戾之挺茂荷一雨之均霑陰騭生成發輝

臣等忝居樞近倍萬歡心無任欣忭悅懌之至謹奉

表陳賀以聞貞元十八年六月十八日

賀西內嘉蓮表德宗 柳宗元

臣某言今日某時中使某至奉宣聖旨出西內神龍寺前

水渠內合歡蓮花圖一軸示百寮神圖煥開異彩交映贊

天地之合德表神人以同歡臣某誠歡誠慶頓首頓首伏

惟皇帝陛下道協重華慶傳種德陶陰陽之粹美孕造化

之精英吉慶每見於天心發祥必自於禁掖是使雙華擢

秀連蒂垂芳香激大王之風影耀集作輝天泉之水煥開宮

沼旁映給園靈貺應期天龍護聖寶曆瓊超於小劫神功

允洽集作協於大千臣某獲覩昇平濫居榮寵聞瑞應而稱

慶仰繪事以增歡無任抃蹈喜躍之至

賀西內嘉蓮表

張仲素

臣某言 臣伏見今月九日中書門下宣示百官西內池中

嘉蓮圖其蓮一本兩花者 臣聞明聖有作天人合應既彰

花本必降祥符即事而推昭昭可見伏惟陛下儲精要道

憂濟群方致理大同猶懼不至所以恢弘聖教資福生靈

玄造感通嘉瑞屢降况茲齒齒儒釋同稱經文但喻乎淤

泥詩人特歌於波澤豈比夫躍銅池 傳芳丹禁濯

影清流特聳孤莖以表清淨之源一致對敷雙萼是明內

外之教齊興天雖不言假物明意 臣仰披圖牒逖覽古先

豈無禎祥莫此昭著望雲就日徒深抃躍之誠舞德歌功

荷報恩私之重無任抃賀慶躍之至 云

為百寮賀瑞筍表

李嶠

臣某等言伏見舊明堂某前有叢竹抽新筍數莖綠箨含

霜紫苞承雪凌九冬而擢穎冒重陰而發翠伏惟陛下仁

兼動植化感靈祇故得萌動惟新象珍臺之更始貞堅效

質符聖壽之無疆隣帝座而虚心當歲寒而抱節一人有

慶萬類呈祥凡在見聞孰不欣躍無任慶抃之至謹奉表

稱賀以聞

為朝官及岳牧賀慈竹再生表 陳子昂

臣某等言 臣等聞書曰天視自我人視天聽自我人聽故

堯臣方命降震怒之災姬旦聖人 集作姬 聖尊仁 受昭事之福先

王所以恭畏上下祇奉天心於是有昭德塞違懲惡勸善所以明枉直正典刑伏奉恩勅宣示司農卿宗正集作卿

所奏日者王德壽等承使失旨霍濫無辜災感蝗蟲毒痛

慈竹寧歲為之饑饉昨庶以之流離冤冤冥呻玄感上惻

乃降明制發德音恤淫刑蠲雪典於是幽冤雪憤遺噍昭

蘇枯竹由其再生蝗蟲為之隕跡集作群蠻動色瘴癘收

氛當天札之凶年致昇平之稔歲非夫聖靈昭感天人合

符何吉凶之徵報同影響天下幸甚臣等聞聖人法天所

以順物小人違道則必亂常故虞稱欽明嚴四凶之罪魯

有仁義正兩觀之誅所以邦家用昌苛慝不作王某等色

厲內荏心僻行堅弄措刑之文為商夷之法以訟受服同

惡自尤竟招殛竄之辜允肅政刑之序今者蒼鷹斂

虎含牙朝廷無腹誹之憂天下有措手之頌信可以懲殘

創酷誘善旌冤求清侮弄之階共登仁壽之域臣等謬贊

臺閣忝守藩維實思仰奉大猷以穆中典幸屬至聖崇德

小人勿用凡在庶品實百恒歡雖成康頌聲文景默化形

清政肅曾何足云伏乞書之國經頌示天下使四方風動

萬國歸仁垂範後昆以為炯誠無任慶抃之至

賀連理棠樹合歡瓜白兔表 武元衡

臣某言臣聞至德有感嘉瑞必呈非汪洋霧霈不能動神

靈非葳蕤合還無以彰明盛伏惟陛下登建皇極二紀于

茲情無忘于一日德彌新於萬載懷徠反側優容真諒至

仁所漸潛銷于毒螫大賚所及無間于忽荒故得禎祥荐
臻策簡填委迨于今日不可勝書此實上天所以丁寧俟
登封告成也今又見許州長社縣劉斌地內連理棠樹圖
徐州彭城縣陽守志園中合歡瓜圖又進白兔并圖等伏
以其棠符於國號連理表於邑中瓜瓞頌於詩人合歡守
於園內兔居卯位白順金色金者取象於武臣白者明資
於義邑足表巍巍宗社長慶於大同赫赫天枝永崇於皇
度俾秉旄節必効精誠懸象告人焯乎明著竊覽前志歷
考休徵積彼千載之祥無茲一歲之盛臣忝私恩覩所未
聞抃舞之誠倍百恒品無任云
文苑英華卷第五百六十三

文苑英華卷第五百六十四

賀祥瑞四

為朝臣賀涼州瑞石表一首

代皇太子賀石龜負圖表一首

為納言姚璿等賀瑞石龜表一首

為納言姚璿等賀瑞石表一首

百寮賀瑞石表一首

賀天尊瑞石及雨表一首

為宰臣賀武威石化為麵表一首

為涇州李使君賀慶山表一首

為許智仁奏懷州黃河清表一首

賀秦州河清表一首

中書門下賀滑州黃河清表一首

賀河清表一首

中書門下賀醴泉表一首

賀櫟陽醴泉表一首

為朝臣賀涼州瑞石表 太宗

上官儀 貞觀十七年

臣元嘉等言 臣聞太陽含宇天之命也德水呈文地之符也是知光膺寶曆非幽贊無以享鴻名對越兩儀非神物何以昌丕緒故有玄龜負卦繇表軒功朱鳥嚙書兆彰姬錄非聖人之撫運孰能與於此乎伏惟皇帝陛下慶臨上元與天皇而合德祥凝太始體耀魄以齊明作周錫胤王

業本於水翼生商降祉寶祚基於玉筐然後樞電効神皇

虹授彩彤雲澹景標映龍顏瑞火流光呈發鳥跡由是凝

圖作極握紀中天化洽九垓恩錦 疑作綿八表功成戢武散

駢服於桃園業定弘文覃正朔於昌海輯五玉而彰禮備

陳萬舞而表樂成至德至仁垂拱巖廊之上乃聖乃神遠

算廟堂之下憲文王而授立招天獎於夢齡象漢帝以登

賢選仁明於剌 國重曜而臨照家萬宇而永貞是以淹

歲亢陽離輝昇而玄澤降春疇宰闕震方建而年稼登受

冊之辰隨輕輪而翊佳氣夏絃之月接飛蓋而吐芝英郡

國陳孝德之符煙浮 一作霏霧集縣道奏明靈之貺電擊雷

奔豈與夫日至月書可同年而語矣伏見涼州都督李襲

譽表奏昌松瑞石合百一十字文曰高皇海出多子李久

唐書五行王八千唐書年太平天子李世民王唐書無千

年太子李治書燕山人唐書有樂太國主尚注唐書作

獎文仁邁千古大王五王六王七王十王唐書無鳳尾唐

作才子七佛八菩薩及上果佛田天子武文唐書作貞觀

昌大聖延四方上下萬治忠孝為善八字唐書作上不治

其文不次者略而不載勅遣禮部郎中柳逞馳驛檢覆並

同所奏皆素文玉潔若瓊樹之華滋玄質碧鮮擬翠微之

遠色雖復霞燦冠岳暉鏤誅疑於介丘海鏡浮山昭列名

於稽山方茲秀麗曾何足云臣等歷選皇猶稽河圖於東

序詳觀帝錄披冊府於西崑媧燧以前不可得而知矣義

農以降乃考載而言焉若乃馬遷堯壇鳳御虞冊麟遊吐

字頗涉劉邦葉蠹為文纔稱病已玄石降徵於典午赤伏

錫命於炎精皆髣髴如神徵文見意或傍通以取證或索

隱以求端猶且動色當年光華曩志矧茲天冊顯發靈瑞

頌聖德之欽明通史筆之揚堯典述國祚之悠永倍龜策

之下周年追羨先朝衍軒立之德姓式昭儲后邁鈞臺之

有光豈非天鑒孔明聖猶大者祥彌著靈心至察德加厚

者祚逾長是用越契超繩光前振古績無與二慶溢登千

臣等自省微生幸霑鴻造荷重光之煦育覩三才之宅心

雀躍無以表其誠鳧趨不足勝其喜臣無任悅豫之至

代皇太子賀石龜石圖表 高宗 崔融

臣某言臣聞虞舜五帝也夏禹三王也應曆數則星昴告期度水上則河精授象故知至誠上感無往而不通神道曲成有來而先見伏惟天皇運斗極平太階漏德澤於海河散皇明於日月煙雲郁郁鳥獸蹒蹒百寶用而銀甕滿五穀豐而丹甌出化之遠及陰陽不測之謂神德之廣被天地無名之曰道嵩高維嶽洛陽下都此焉符理之所古則仙靈之地伏見洛州牧相王所奏嵩山下頂封禪壇側掘得石龜負圖篆文一百六十字者臣亟聞其言矣昔者黃轅東省河獻龍書蒼頡南巡洛呈龜字古猶今也其若茲乎夫惟氣挾風霜文含星象玉經山上匪藉傍求銀丹池中居然暗發頌國祚之長久孕育於萬八千年歌卜筮之叶從牢籠於六十四卦况復高臨秦室近控洛壇佇降王者之封常有君來之望由是神工不召若鑄金鏤之名天意潛彰似刻銀繩之篆豈與玉龜在泰山之上莫覩其祥石龜出吳江之右空傳其跡可同年而語哉臣才謝元良忝當儲貳三靈睠命預聞東序之圖萬國心歡願奉南山之壽無任悅豫之至謹遣某官奉表稱慶以聞臣某誠歡誠喜云

為納言姚璿等賀瑞石龜表武后李嶠

臣某言伏見衡州所進瑞石形似龜頂上有文曰大周并有乾坤卦字左邊有王武九千字又有水火金木土字各依其方北邊兼有井字臣等詳觀靈字伏覩奇文事實非

常理同神仙疑首列大周文疑作字表元首之尊左有王

武之名明左契之執合乾坤之兩卦分金木之五行五行

展轉而不窮兩卦周流而無極井以養物而知渥疑作澤

之下覃石以補天乃顯貞堅而上列將以九千之寶祚嗣

七百之鴻基兆發靈心事符嘉運况復名為玄武叶國姓

而呈休出自炎方迎嚮明而發祉神祇之命受託於四靈

感應之符實超於千載臣等叨延恩獎屢覩一作嘉祥喜

抃之情實百常品無任慶躍之至謹奉表陳賀以聞謹言

為納言姚璫等賀瑞石表

前人

臣某等言伏見瑞石有文曰武帝李彰好生臨國永保吉

昌伏惟陛下受命旻穹降靈宗祐復棟重簷之禮嚴配昭

并五刑九辟之科平反宥恤故能使三精孚德七廟垂祥

類降靈符屢彰潜祉好生臨國寔開琬琰之文永保吉昌

顯示貞堅之錄降萬代之遐筭曠千齡而不聞臣等叨沐

恩私謬當樞近親覲休寶相趨抃躍無任嘉慶之至謹奉

表稱賀以聞仍請出示百寮并錄付史館

百寮賀瑞石表武后

前人垂拱四年

臣某等言臣聞高明傳臨無遠不應正直潛感雖幽必通

伏惟皇太后陛下慶發曾沙業隆大寶以至明當宗社之

寄以至聖合乾坤之德荷三葉之休光承五形之曆紀平

秩庶政大亨羣物冠帶遐荒之域天福日臨閭閻富壽之

氓禮變樂和液露霑洽休徵昭顯用能上披乾象下發坤

珍吐川之靈祕開神之韞匱伏見雍州永安縣人唐同泰
於洛水中得瑞石一枚上有紫脉成文曰聖母臨人永昌
帝業八字臣等抃窺靈迹駭矚珍圖俯仰殊觀相趨動色
竊惟聖德奉天逆爲先後神道助教相因發明陛下對越
昭升欽若扶揖允塞人祗之望寔當天地之心所以幽贊
嘉兆傍通景貺且人稱同泰縣實永安姓氏將國號玄符
土地與石文明應表裏潛會樞機冥發明宴坐之逾昌驗
皇基之永泰則自然之無朕不測之謂神非夫道格昊蒼
德克幽顯豈能發何言之微旨臻不召之靈物考皇圖於
金丹搜瑞典於瑤編則有蟲蠹成文魚鱗吐匣卅書集於
昌戶綠錯薦於堯壇或詞隱密微或氣藏識綿莫究天人
之際罕甄神祕之心未有昭聖毓靈發祥預祉明白顯著
燭曜暉光若斯之盛者也且夫導洛疏津卜瀍經宇是開
帝王之宅實謂龜書之泉伯禹以致孝鬼神九疇天錫陛
下以虔恭顧託八篆靈開超萬祀而同存歷百百疑而罕
逮况乎陰陽景測朝市天臨號令施於四海機衡動於萬
國靈心叶贊景業會昌薦希代之鴻寶獲非常之嘉應固
可以明禋太寶禮秩介丘副神宗之廼瞻答上玄之蕃祉
臣等遇偶休明榮參筭笏千年旦暮邀逢累聖之期百辟
歌謳喜屬三靈之慶無任鳧藻踴躍之至謹表詣闕陳賀
以聞

賀天尊瑞石及雨表

臣聞大悲握契汲引之數盈千玄聖垂機感現之瑞不一
隨緣應俗或作儒童降跡通凡常為長者然則前佛皆同

一字可通疑作道非道理兩名至矣哉不可得而稱也伏惟

天冊金輪聖神皇帝陛下功成塵劫跡御金輪萬姓樂推

百靈欣戴如來備記昔避天女之宮菩薩降生遂坐人王

之國臣等一昨伏見四疑岳雲臺觀道士奏稱御像瑞石

大妙至極天尊一鋪創造聖容未施五色宿昔之頃畫績

自然不加之分宛同神化七十二相合而成體八十一好

散而成章披絳雲之室闡明霞之館千乘億騎浮空而下

九仙五老步虛而來羽抱錦帔風搖雲起龍文而鳳章日

縣而月綴威儀而辟侍衛無聲坐疑龍漢之遊何必仙山

之會自非陰陽不測變化無方憑法匠之威靈假神功之

動用其孰能與於此賀中臣等又聞先天後天聖德合於無

象欲雨而雨玄契通於不言日者王室屋一作屈聞炎方在

侯陛下乘朱輅駕赤騮歷太陽之中道居明堂之左个百

神受職萬國來朝既配帝而嚴禋亦統天而布政是時也

慈雲結慶甘露流香微風蕭然纖塵不起凡百在宥動色

相歡咸以為天者萬人之本物有不霑於澤者則仰皇天

而望之有不單於惠者則籲告而請之更祈洪澍輒聞流

潦俄而油雲族晚覆雙闕而朝濟膏雨及私浹三川而校

疑下郊原吐潤呈彙霑蘇麥壘纖莖已濯兩岐之秀黍田

香粒方茲合穎之苗凡在群生不勝幸甚然後知御雲臺

而占繇幸洛陽而錄囚盖其耿少曾何髣髴臣等幸忝簪笏預睹珍符惟德洞冥即叶元皇之化惟靈薦福長延梵帝之尊抃蹈之情倍百恒品無任鳧藻之至

為宰相賀武威郡石化為麪表玄宗孫狄天寶三載

臣等伏見王倕奏武威郡番禾縣嘉瑞鄉天寶山周回五六里石化為麪在近村間及諸郡部落自今載正月以來取食其美益人又按圖經貞觀九年鳳凰集於此故名嘉瑞鄉其天寶山在此鄉界伏以神道設教變化無方聖人為心感通必應陛下仁霑動植澤及生靈故得地不藏瑤石變為麪既資人食又濟邊廩成熟自因於道氣艱難不待於農功豈麤麤之足方何雨粟之能喻况山符聖號用彰於萬壽鄉表瑞石允迪於前列殊祥叶應景福攸臻臣等忝侍軒墀倍深慶悅無任抃懼之至謹奉表陳賀以聞

為涇州李使君賀慶山表武后崔融垂拱二年

臣某等言某日奉某月詔書新豐縣有慶山出曲赦縣囚徒改新豐為慶山縣賜天下輔三日凡在舍生孰不慶幸

中賀微臣詳窺海記博訪山經方丈蓬萊之疑作跡所罕

到層作增城玄圃道家之妄說伏惟皇太后陛下應天順人

正位凝命中外咸一陰陽以和嘉木四方而平春露草三

旬而候月冲恩浹洽嘉貺駢闐當雍州之福地在漢都之

新邑聖渚潛開神峯歛見政平而湧自蕩於雲日德茂而

生非乘於風雨游龍蜿蜿疑呈八卦之圖鳴鳳噦噦似發

五音之奏仙蠶曳繭美稼抽芒一人有合於天心百姓不知其帝力方驗鎮星垂象山萌輔地之徵太歲加年水兆載坤之應天人交際影響合符雷雨既作喜氣冲於三象鍾石以陳歡心動於萬物臣幸忝簪帶濫守藩隅不獲馳蒼闕而拜手望紫庭而繼足殊祥踵至寶筭無疆厚賚傍霑群生一有之字非幸甚不任悚踊之至謹遣某官奉表以聞
為許智仁奏懷州黃河清表 太宗 前人

臣智仁言 臣聞德水清漪詩人以之興頌濁流澄鏡大聖於是登期伏惟皇帝陛下道叶二儀功超萬古上玄降祉變孟津於淶波厚載呈祥發榮光於翠境 臣以去月得河內縣申云自太平村已下三十餘里河水變清各遂淺深

冷然徹底鱗介之族無所藏形一作養藏謹自依極此句疑息同

其狀又嵩高維岳形人清流少室竒峯參差具寫謹按易

坤靈圖曰聖人受命瑞見於河伏見涼州玄石式昭靈命

臣部黃河應時清徹天禎地貺既符易象之文聖祚河清

暗合靈圖之義古人歎其難候 臣今乃得親觀身體太平

之風目擊會昌之瑞無任悅豫之至 唐書五行志涼州立石在十七年懷州河

清乃十六年當考

賀秦州河清表 太宗

同前

臣聞崇高不極之謂天廣博無涯之謂地若乃參天地之玄化代覆育之神功者其在聖人乎故能俯同五情恩浸八紘允膺千載仁霑萬代明靈之貺自我所招幽顯合符

斯其效矣伏惟皇帝陛下家六合馭三光推明允之一心
置於天下之腹用徇齊之四日招於萬物之情靖蟲麋殂
之所安猶懷夕惕與頌芻蕘之警說尚迴天睠其所愛育
者多矣而况於鰥寡孤獨乎其所容納者衆矣而况於公
侯卿士乎至若削平宇宙混一華夷乃武也致疑教會昌
樂新禮創乃文也穆巖廊以疑駟調風雨於絕恨疑乃聖
也運埏埴以裁成動陰陽而不測乃神也體茲四霽伴彼
兩儀神物之來蓋惟常理伏見秦州刺史表今月某黃河
水復清深淺澄映百有餘里清自龍門之下驗登期以御
天波及萬春之卑表無疆以彌壽臣聞道之所格者弘則
靈之所感者大德之所包者厚疑則地之所應者深是以

平祀登期自古歎其難遇一歲之內祚聖人而再清求諸
典墳竟無倫匹在於明世絕後光前宜其上答靈心升中
告禪金聲一作玉振合百神於介丘玉輅未輪副萬國之
翹首則普天幸甚何其樂歟臣等越自下才欣逢上德致
百王之不致聞億載之未聞舞蹈之深實百忝品

中書門下賀滑州黃河清表

德宗

權德輿

臣某等言今日內侍朱希顏奉宣進止示臣鄭滑觀察使

姚南仲所奏今月一日至六日白馬縣界三十里黃河清

者伏以道集作自積石出於崑崙乃建靈源之封特視上

公之禮克符昌運必降殊祥伏惟陛下聖澤感通休徵集

貞疊委惟此濁質化為清瀾國典所書是稱太瑞詩曰俟

河之清人壽幾何歎其不可得而見也今則白馬之津三十里所澄澈如練淪漪成文一邦幼艾共觀嘉應乃寓經界式彰未寧昔秦虢水德徒推厭勝漢紀河平苟安决溢神功幽贊獨表清時足以薦諸宗廟書之史策臣等忝集集謬登樞近獲奉休明無任欣抃踴躍之至謹奉表陳賀以聞臣某等誠歡誠抃頓首謹言貞元十四年五月十五日

賀黃河清表憲宗

臣某言臣得進奏官狀伏承河陽奏汜水西界從洛口黃河清一百六十里又橫海軍奏界內河清澄徹分明者臣聞聖人在上天下和平風雨時若則海波不蕩黃河清夫土所以載水水所以利物天意鍾土德之道疑開水端之

華符我上聖祥於下土中賀伏惟睿聖文武皇帝陛下蹈十聖之原軌陳一王之大法垂衣裳以朝萬國舞干羽而來四夷平泰階於天纏纒師節於靈臺故得濁波渾渾千載一清長瀾浩浩百里如鏡氣新天宇光澈地脉仰分萬象之法中涵千聖之德初澄海裔表陛下橫恩波於海上再清洛口助陛下鋪文明於土中二十八日兆陛下告成之日也百六十里期陛下得聖之數也臣謬承分闡之寄叨榮持節之權生當海宴之年幸識河清之日未奉明詔不敢擅離軍府詣闕隨公卿蹈舞明庭下情無任西望踴躍之至

中書門下賀醴泉表代宗

常袞大曆二年

臣等伏以西京櫟陽縣有泉水於平地湧出潔誠飲者錮疾咸痊稽之圖牒是曰醴泉臣聞和氣上感湛恩下浹則有休徵以彰至化近在兩金之地特啓茨泉之瑞無源獨湧平地滂流當神明之積高表陰陽之不測其氣香潔其味甘醇抱華清而盪邪資靈化以除穢積年之疾一飲皆愈挈瓶而至重跡相望日以萬計酌而不竭齊莊之誠益厲神達之效愈彰伏惟陛下弘父母之深仁納黎元於壽域感此靈液助其生成疾苦假除天昏不作勿藥有喜愛人斯甚可以見天地之心可以明帝王之德昔唐堯至聖光武中興沛然發祥千歲一覩啓我昌運居然合符鴻休無疆天下慶幸臣等謬司近密喜倍常情無任忻慶之至

賀櫟陽醴泉表

獨孤及 同前

臣等言伏見京兆尹李勉奏櫟陽縣有醴泉出飲之者痼疾皆愈臣聞王者澤周庶類則神降百祥天地之心去人不遠陛下厚德載物與坤同符以善利人如水潤下故厚集作土獻瑞湧泉瘳疾靈源酌而不竭沉痾飲而皆痊勿藥之喜萬人是賴仰窺天意豈不以是彰陛下之德施乎不然何衆庶顛顛強名聖水彼丹甌集作朱草白麒赤鴈徒稱太平之瑞未聞功施於人方之聖泉豈喻神異臣等無任喜慶之至

文苑英華卷第五百六十五

表十三

賀祥瑞五

賀杭州等龍見表一首 賀隰州等龍見表一首

賀常州龍見表一首 賀富平縣龍見表一首

皇太子賀白龍見表一首

賀麟跡表一首 賀東川麟見表一首

為魏州成使君賀白狼表一首

中書門下賀文冊國獻白象表一首

賀白鼠表一首

中書門下賀河陽獲白兔表一首

賀白鹿表一首 賀白野鷄表一首

中書門下賀邢州獲白雀白山鵲表一首

中書門下賀興慶池白鷗鷓表一首

為百官賀白鳥表一首

賀杭州等龍見并慶雲朱草表 許敬宗

臣某言 臣聞休氣降祥與聖人而合契明靈之貺候昌辰而咸通自五帝寂寥九皇悠緬神龍逝夏中之世一去莫追景靈歇伊帝之朝千齡不嗣逮乎茲日翔驟來儀天道去人何其交際伏惟皇帝陛下化龍疑作隆乾棟施厚大鑪馭三光以照臨物萬寓而光宅雖復荒陬之遠億兆之多一物不安則宵衣載惕四夷有罪則納隍興歎日者東師作梗類農皇之夙沙交河阻兵等軒后之德儉元戎所轄

太漢申湧醴之奇齊斧裁加昌海效靜波之慶既而西師獻捷東岱希封日告禎機歲登靈稼表裏禔福彰外平而內成幽顯合符叶天意於人事伏見杭州刺史潘求仁表稱於錢唐縣界見青龍一又江州刺史左難當稱尋陽縣界見青龍二又得汝州及沂州狀稱所部各有慶雲見又延州刺史席辨稱臨貞縣界有朱草生 臣等以管窺天之意若曰青者方色宜順動以東巡龍者帝閑可駢駟於大輅非煙五色雜雲旗於翠華朱草三英代靈芽於芳籍豈非以茲幽旨警悞皇情促升中以奉高與 臣等自慶一生頂逢千載雖復仲尼將聖恨出圖之末期夷吾大賢嗟比翼之難致羣臣庸昧竊譬古人幸遇休明勝之多矣披

祥溢目觀祕驚心庇大厦以相歡荷施生而罔謝無任鳧藻之至

賀隰州等龍見表

前人

臣某等言臣聞徇齊御極玄滬疑作表其麝鳳文思則天

黃河祝其龍馬是知利克於物乾坤應而合符行出於身

明靈感而幽贊伏惟皇帝陛下道登邃古功濟懷生發軔

升陟墾災出漢書除害坐王帳振金鼓運天機掩區縣然後

散服林塞偃伯靈臺羈左袵以長纓同文軌於遐裔禮高

年以執酒醑通孝敬於神明

猶且昧且不顯凝旒庶政臨草纓而罪已削金謀以勝殘

化洽風移禮備樂備是以百靈効職四海夷波物不疵厲

人無此窳烟雲動色星辰叶契儀雙絡之駿奔莫飛其之

清醴黃金揆彩紫玉摘英粵自離陸之前其事無得而聞

羲軒之降書契可畧而詳焉未有茂實鴻名若斯光大休

徵美端疑作如此感通伏見隰州刺史表衷疑異度表稱

某月日青龍見隰州城北大四五圍長八九丈謹按瑞應

圖云青龍水之精乘雨而下不處深泉王者有仁則出竊

惟升雲騰霧孔氏論而不知凌江負州疑作大禹對而猶

懼豈如丹文錄錯驟簡皇情或躍且飛亟遊明世蒸哉懿

已絕名考曆觀圖將何取譬臣等撫躬私抃鼓腹相

歡忽以微生同沾一作大賚逢物覩之昌運覽天祚之禎

符開闢已來未聞斯遇千齡一會猶謂比有何幸之深親

承旦暮鸞雀相慶實百常情不勝悅豫之至

賀常州龍見表

前人

臣某言_臣聞聖人作而萬物覩神靈滋而百寶用是以飛龍御天五雲勝彩潛龍涵池四海夷波軒帝由其受圖大昊以之爲紀莫不游泳宮沼駢服輿鑿玉牘丹文與會昌而契合金繩綠錯候休明而降祥伏惟皇帝陛下道極上玄功成下武重光煥籙體睿凝圖至德克於兩儀大孝刑于四海_{一作}網地張天之謂武制禮裁樂之謂文惟幾惟深運神樞而不測無爲無事致璇曆於平分故能網絡九重琢磨三代溥天之下用至道而不知懷生之倫荷大造而無謝於是湛恩洋溢休氣氤氳上格天下漏泉不私其

照日月爲之揚彩不愛其道鱗介所以騰文神物有徵於斯不忒伏見常州別駕終文英表稱所部晉陵縣尉信都叔卿等七人以六月十三日於縣城南雲雨之際見有青龍長數十丈大八九圍久之乃沒謹按熊氏瑞應圖曰有仁聖君子在位不肖斥退則見惟皇作極感而遂通惟德動天遠無不應是使四靈嘉瑞叶千祀之登期五色榮光高萬古之靈睨方且以茲嘉祉造類雲亭頌其微猷歸功清廟豈與夫魚生露鼎蔡上荷心竹蒂凝珠晨昏合璧校其優劣何可同年而語哉_臣等運偶明時預聞靈慶不任鳧藻之至

賀富平縣龍見表

前人

臣某等言臣等歷選前辟皇王之道詳焉遐觀曩載致治

之方備矣竊聞垂衣垂拱之世追獯鬻而匪寧乘舟乘橈

之期即折支而僅叙堯民有竄徒謂可封湯禱無徵非合

一作能具美道光史冊幽贊禎符各擅鴻名俱為稱首况以

括地成象中天作鏡代玄功而造物叶神化以開祥取譬

前脩豈同年而語矣伏惟皇帝陛下受初或躍嘯命風雲

廟彼重昏裁成環畧張維立極不盈少選之間邁五登三

度越十齡之表施生靈於動植日用者不知混覆燠於華

戎航深者忘遠巍巍乎赫赫乎書契已來未之聞也猶且

雷神昧且克念終朝去歲以膏澤遲時撤八珍而罪已今

春以濯枝未降輟萬騎於甘泉狗物為心憂勤至矣於是

天先致感畝積餘糧聖敬日躋虛心効祉近得富平縣令

獨孤仁宗奏云十二月一日白龍見又得沂州刺史李道

遷狀云去年二月內景雲出又臣聞之天飛水游洞陰陽

而不測雲行雨施混神妙而無端龍之謂靈義彰於此至

乃千年韓疑慶四和克瑞名叶堯歌色符軒紀卿雲所貺

復在於斯陛下挺睿哲之資納明靈之祐是以冲天宛宛

貫六位以呈祥祕景紛紛亂五章而發彩故能遠安邇肅

理定功成動而弗違告禪展禮 報功使夫同和之樂

與鈞天而並奏無體之禮對上玄而比隆超出萬古之前

獨立九皇之上道格區宇何其盛歟臣等屬會昌之辰曲

成惠日倏聞嘉瑞再佇升中慶賴之深實兼恒抃不任鳧

藻之至

皇太子賀白龍見表 高宗

崔融

臣等言伏見某官等奏稱某月日玉山宮西南王谷上有白龍見臣聞天地和平聖人所以乘九五帝王符命神物所以寤黎蒸粵若皇家既高居而遠望於惟史閣亦舒圖而負璽疑服星辰之冕袞彩奪華蟲建日月之旂常文騰翠鳳出東方而據木天下知春臨北荒而御火容光是燭風雨順陰陽和五穀登百寶用豈孫氏所謂出入應命上下以時無道則處有聖則見矣木火中星長風季月詳乎戴禮則帝嚳乘龍之時校以河圖是黃軒夢龍之晦裁金別字挺玉名區宮摸抗殿之基山接陵陽之路翩翩素翼

矯矯白鱗異彩霜封風姿雪操一作徵鄴城之故事若下

神祠探吳郡之遺塵疑過象冗臣聞感通之效人事可尋

嘉瑞之來天心容察地稱王谷先題王者之名壤號玉山

寶兆南山之固天皇以帝出乎震自天鍾有德之期天后

以致養乎坤承天得西南之位披圖按諜影響合符漢朝

之出在上封特其小者晉國之來從京兆曾何足云唯我

后能得之固前王所不逮方使見龍于甸一人繫年月之

書豈宜罔龍于池百姓為朝夕之觀而已臣業謝温文觀

聞絕瑞雖四靈為畜未足以舞之蹈之而萬國歡心敢忘

於美矣盛矣不勝鳧藻之至

賀麟跡表

李嶠

臣某言今月十六日聖上擬檢行安置大像處其夜舊著大像曜儀院內從南行向北總有八十一麟跡見外無入處內有出蹤靈貺潛開楨符顯發唯此仁獸獨冠毛羣識變知機通靈感化悟金輪之欲轉即見殊祥知玉輦之方遊先呈異跡九九爲數明曆筭之無疆濯濯咸歌見休明之有應五蹄顯五方之會一角彰一統之符式廣鴻基方弘象教昔有鳳巢軒閣纓冕相趨龍止堯壇神祇動色豈若祥開紫掖瑞感玄樞發揮萬劫之符幽贊三天之果美超五籍珍越四靈曠千古而不聞超九皇而獨遠臣濫承驅策親覲嘉祥欣慶之情實倍恒品無任抃躍之至謹奉表陳賀以聞伏請頒示天下錄付史館

賀東川麟見表

憲

張仲素

元和七年

臣某言伏見劔南東川觀察使潘孟陽奏龍州寶華山中
有麟見獨角馬蹄遍身光耀并嘉禾二十二莖至八十九
穗麟見與鹿每來同食各畫圖函盛封進者臣聞六合同
歸則麒麟至天下和一則嘉禾生伏惟陛下昭事上帝疑
情衢室宵興滌慮申旦忘倦大敷至化以求時邕故得希
世之祥應我皇運異質卓犖竒彩光明顧步幽巖發聞郡
國神物自生於聖日靈編徒載其嘉名况大田之中衆穗
斯茂沐以膏澤扇其祥風而後呈彼珍群承茲共觝必生
長畝之秀以期王者之瑞因緣所驗鄭重介符有以識上
聖之心兆至和之本德超千古慶洽無疆日月所均無思

不服臣等幸覩休異喜萬恒情無任抃躍之至

為魏州成使君賀白狼表

崔融

臣某言某月日得所部魏縣申稱得令孟神符諜稱某日得佐吏長壽鄉單守中狀稱隆周長壽兩鄉界有白狼見臣等嘗恐是虛未敢即申因處分諸鄉若有見者輒令繫取某日長壽鄉致仕前游擊將軍上柱國朱佛兒於長壽鄉界內逢白狼馴狎無懼人意遂以繩絡頭繫得隨送者臣謹按瑞應圖云白狼者金狼精也殷湯時銜鉤入于庭王者仁智明哲即至動準法度即見周宣王時見而犬戎服伏惟皇帝陛下玄期兆朕靈命氤氳物類有感而必通符祥不召而總集金精累爍鼓鑄於陰陽玉毳霜翹騰倚

於郊甸應時乃出野心狎而無驚有道則游貪性馴而不搏亦何必兕豹可履虺蜺可弄者哉徵故事於璇鈴考異聞於玉冊出自神符之縣顯符命之通神來於長壽之鄉明久長之益壽重以陛下獨尊三界高視四天身運明哲動循法度既合周王之時仍彰犬戎之服上玄潛驚佛兒來送天尊若曰陛下養衆生其如二乎善守其中忠亦可知矣謹尋令式唯合申臺臣以尊號初加神聰顯應守文不奏恐爽靈心無任躍悚之至謹冒死遣官奉表稱賀以聞其白狼既非常獸臣未敢即放之山野見令佛兒養飼伏聽進止

中書門下賀文冊國獻白象表 常袞

臣等言今日內侍董秀至宣進止文冊國王來朝并獻
白象十一頭者臣聞春秋二百四十年不紀祥瑞而載異
國之朝其在周書亦美西戎之獻蓋重其德化及遠天下
大同也伏惟陛下以致敬事天地以致孝奉宗祀武功以
定大難文德以懷遠人故舊典未載之邦前王不賓之長
聲教所隔言語莫通悠悠南溟幾千萬里瞻望中國知有
聖人踰海而來歷年方至紳疑冒重阻奔波載馳黃帔飾
冠白鎗玩耳伏柔群象牽置闕前低迴馴擾稽顙屈膝隨
萬國而來庭與百獸而率舞如知禮樂之節益盛羽儀之
容有以彰仁化玄通淳源洽暢至和大順以兆昌期事軼
於軒轅跡超於漢代矣臣等謬塵樞近獲覩鴻休伏請宣
付史官光照簡策無任慶抃之至

賀白鼠表

前人

臣某言今日內常侍吳承倩宣恩命示臣咸陽縣所進白
鼠臣聞王者將致無疆之休必有非常之應臣竊謂鼠者
陰類四夷之象白日金精西方之色以西方陰類受制於
近郊得非諸戎有納款之誠中國啓受降之兆也伏惟陛
下俯憂黎獻控馭蠻夷能以禮綏執云力競而晝伏夜動
時擾於封疆乘障安邊尚勞於師旅今天且悔禍戎將感
恩方委貢於蠻貊即遂呈祥於甸邑干戈既息已有明徵鳥
雀之來多慙遠瑞臣等忝居近侍獲覩禎符歡抃之誠倍
萬恒品

中書門下賀河陽獲白兔表 德宗 權德輿

臣某等言今日中使揚明義奉宣進止示臣河陽三城節度使李元淳所奏今月六日於河陽縣城南社壇獲白兔者謹按孫氏瑞應圖曰王者加恩耆老則白兔見又前史所稱多自純孝之本集作感伏惟皇帝陛下誠合天地孝通神明玄符嘉祉遠近相屬雖集作惟此瑞獸是稱月精來應昌期皓然雪彩當盟津之壘俯勾龍之壇邦畿士吏駭視歡賀且自前歲已來中外所列凡在羽毛之族多呈皎潔之祥今八陵園寢修復斯畢萬國臣察手足相慶盛儀既展靈貺斯臻幽贊素姿若合符契臣等謬居台鼎倍萬恒情無任慶抃之至伏請宣付史館謹奉表陳賀以聞貞元十四

八月二十一日

賀白鹿表

令狐楚

臣某言臣得進奏院狀報中書門下奏賀於醴泉縣建陵

栢城獲白鹿一聖敬日躋禎祥荐至臣某謹按孝經神契

曰王者德至禽獸則白鹿見伏惟陛下盛德配天深仁育物和氣交感出為休徵懿此異獸挺茲奇表在嶠山之側宛是隨仙來魏闕之前如將率舞天下稱述兆人歡慶昔者周因征伐而獲漢自祭祀而臻比今無為宜有慙德臣某幸逢昭代獲覩玄功欣抃之誠倍百恒品所守有限不獲隨例稱慶闕庭無任屏營踴躍之至

中書門下賀白野鷄表 代宗

臣某言內常侍吳承倩至宣示臣淮南節度使陳少遊所進白野鷄者臣聞聖法天以調氣天表聖以呈祥皆啓迪皇猷發揮至理事均影響必在感通伏惟寶應元聖文武皇帝陛下德合大和化高前古休徵異瑞以月繫年方啓疑率舞以來儀豈疑重譯疑而作貢臣謹按瑞應圖云王者仁聖旁流四海則見又云祭祀不相踰宴會衣服有節則見耿介之性自能馴狎絳雜之姿翻然純素丹立楹檻雪映雕籠時和自叶於禎祥天意實彰於變化豈越裳之獻獨美於前王而岱宗之精用呈於今貺必然之應幽贊如斯載表太平之符克明柔遠之德臣謬參樞近獲觀鴻休慶躍之情倍萬恒品

中書門下賀邢州獲白雀白山鵲表 權德輿

臣某等言今日伏奉宣示昭義軍節度使李元淳所進於邢州獲白雀白山鵲各一者謹按孫氏瑞應圖曰王者奉已儉約尊事耆老則白雀見又晉中興書曰天下安寧則見伏惟陛下純儉成化乾坤合符敬彼黃髮感茲霜毳俗既登於壽域事多驗於祥經用應昌時固無虛月昔神雀效祉乾鵲知來或用以紀年或聞諸往載豈比山禽叶質靈貺特殊皎潔異姿追飛交映休嘉所集遐邇同歡臣等忝列台司倍百忻賀無任喜慶之至謹奉表陳賀以聞

中書門下賀興慶池白鷓鴣表 德宗 前人

臣某言伏承陛下以去月九日幸興慶池龍堂爲人祈雨

忽有一白鷗鷁見於池上衆鷗鷁羅列前後如引御舟明日之夕甘集作雨遂降者伏惟陛下子惠元元躬勤庶政

念切時澤虔於祈禱以陛下如傷之誠上感玄貺在烈祖

發祥之地下降靈禽潔白異姿翻飛成列若應天意以承

宸衷族集作陰雲於一夕灑霈澤於千里疾均影響慶浹

公私昔周致白翟徒稱遐邇集作漢歌赤鴈亦薦郊廟豈

比今日感於至誠瑞謀所無蒸人何幸伏望宣付史冊昭

示將來臣等備位昇司倍百惟賀無任欣慶抃躍之至謹

奉表陳賀以聞貞元十三年四月十二日

為百官賀白鳥表

令狐楚

臣某等言臣昨二十三日中書宣武軍節度使臣劉彥佐

進白鳥并以鳥及所獻圖示百官臣某伏以殊祥絕瑞有

應斯歸細縕感通難識其朕惟聖德動于皇天天意勤于

聖后則必昭彰彤蜺靈物荐臻流行葦之仁樹太平之業

毛羽遂性禽鳥呈祥臣等中賀臣謹按孫氏圖云王者宗

廟敬則白鳥至又漢成帝時白鳥集於文武廟黑鳥皆從

頗類此圖去年冬十一月履端之始陛下擁萬國驅百靈

祀圓丘封天老前一日已孝享於宗廟盡敬致美竭力精

誠悲感之音動於列辟孝敬之極通於神明白鳥之來允

答醇至書之史冊萬代有詞觀其素彩皓潔丹紫朱躍冰

霧疑作奪色龜龍騰輝參五雲周禮雖有五雲又疑別用事之嘉祥掩

百王之能事臣等叨逢昌運累沐殊私親覩太陽之精克

叶大君之杜歡躍抃舞手足無從不勝犬馬欣慶之至

文苑英華卷第五百六十五

文苑英華卷第五百六十六

賀捷一自此賀捷表凡三卷英華所編既不以類從又失其年代今各以先後而正之

賀平鄴都表一首

為納言姚璿等賀破契丹表一首

為建安王賀破賊表一首

為常右相賀平賊表一首

賀賊自相誅滅表一首

賀章仇兼瓊克捷表一首

為宰相賀檀州界破奚賊表一首

為宰相賀破吐蕃并慶雲見表一首

為宰相賀九姓斬送突厥首表一首

爲宰相賀匈奴來降表一首

爲宰相賀隴右破吐蕃表一首

李採訪賀收西京表一首

爲江淮都統使賀田神功平劉展表一首

爲江淮都統使奏破劉展兵捷書表一首

爲江東節度使奏破餘姚草賊龔厲捷書表一首

賀袁倅破賊表一首

賀平鄴都表

周武帝

庾信

建德六年

臣某言臣聞太山梁甫以來即有七十二代龍圖龜書之

後又已三千餘年雖復制法樹司禮殊樂異至於文類集作天

籬武落刻木弦弧席卷天下之心苞含八荒之志其揆一

矣類聚作焉伏惟皇帝陛下握天樞秉地軸駕馭風雲驅馳龍

虎沉雄內斷不勞謀於力牧天策勇決無待問於容成是

以威風所振烈火之遇鴻毛旗鼓所臨衝風之卷秋葉竊

聞伊洛戎夷幽并僭偽抱圖載籍已歸丞相之府銜玉繫

綬並詣中軍之營百年逋誅遂窮巢窟三代敵怨俄然掃

蕩昔周王簫水之師尚勞再駕軒轅上谷之戰猶湏九代

未有一朝指麾獨決神慮平定寓內光宅天下二十八宿

止餘吳越一星千二百國裁漏麟洲小水若夫咸康之年

四方始定建武之代諸侯並朝不得同年而語矣雖復八

風並唱未足頌其英聲六樂俱陳無以歌其神武坐釣臺

而誓衆妙啓繼夏禹之功入商郊而問罪姬發成周文之

志無改之道大孝也歟當今鹿臺已散頃宮已遣兵藏武庫馬入華山立明堂之制奏大武之樂盛矣哉上天降休未之有也政須東南一尉立於比景之南西北一候置於交河之北然後命東后詔蒼冥衢壇琬碑銀繩瓊檢告厥成功差無慙德臣忝竊榮幸蒞政東藩不獲躬到闕庭預觀大慶不勝鳧藻踴躍之至謹遣主簿陪臣曹敏奉表以聞

為納言姚璿等賀破契丹表

武后李嶠登聖二年

臣某等言伏見遼東都督高仇須

英華作頃非

承露布逆賊孫

萬斬

按唐書聖証元年改制契丹首領李盡忠為盡賊孫萬榮萬斬英華作榮非

等驅率凶黨

燒逼州城城中出兵與其賊拒戰則有飛廉作氣回祿揚

爍起沙礫而薄天助茲龜鼓吹煙火而漲日燎彼鴻毛靈

應潛施勇士皆奮遂使妖徒震懾亂轍而舉旗善戰橫行

摧枯而拉朽僵屍蔽於草芥俘馘聚於轅門善馬咸牧名

王且繫無假燒鷄之策而觀其自焚不勞燧象之師而撲

一作

其餘燼又凶渠不逞將竊號而假名逆黨未悛

一作誅

止挺妖而怙亂或神摧其股或天厲其身似安國之登車

同伯牛之自牖故知高明輔順正直司憇惟辟好仁與乾

坤而合德惟狂樂禍在神鬼而同誅方看剪滅之期行覲

凱旋之奏

臣等叨延獎渥謬奉軒墀抃躍之情實萬恒品

無任慶快之至謹奉表稱賀以聞謹言

為建安王賀破賊表

陳子昂

臣某言今日得遼東都督高仇須等日月破逆賊契丹
孫萬斬等一十一陣露布并捉得生口一百人送至軍前
事三軍慶快不勝踴躍臣聞天之所棄雖暴必亡人之共
讎在遠彌戮况凶羯遺醜未及犬羊固作孽以招誅自辜
恩而取滅伏惟陛下威加四海子育百靈集作鬼神尚不
敢欺集作遠集作凶狡豈能逃罪逆賊萬斬等天奪其魄生自為
殃仇須等謹奉廟謀遠憑國討短兵纔接群逆銷亡又云
反風迴煙燠晴掩日此乃天威潛運神道密周豈止人謀
仰由靈助今盡滅殃病婆固折股一作婆饑災兼至凋弊
日滋未加天兵已集作自糜爛臣訓勵士馬今日集作尅
行大軍一臨凶寇必殄獻俘在即拜闕有期預喜承恩不

勝慶賀無任抃快之極

為帝右相賀平賊表武后

崔融

臣某言伏奉某月日遞勅逆賊等並已傳首都市幕庭拜
受旌門宣告凡預軍司孰不慶悅中臣聞惡禽恠獸有以
彰普覆之仁亂臣逆子不能損盛明之德故三監作難周
王未寢於頌聲七國為災漢帝克臻於刑措伏惟聖母神
皇陛下象天之運法地之安澤浸河海光懸日月以忠信
為甲冑以慈惠為干戈所向無前何人不服舉神兵如電
掃破兇黨若水離數月妖氛一朝清蕩斯實皇威遠肅聖
化傍霑故能市不改肆人皆安堵臣濫承天澤忝預戎麾
聞逆命而憎憤聽臬懸而累抃慶快之情倍百恒品不任

悅豫之至謹附某官奉表稱賀以聞

賀賊自相誅滅表 玄宗

張九齡

此篇當在六百三十七卷賀狀門今已移入姑存其目

賀章仇兼瓊克捷表 玄宗

李邕 開元二十八年

臣邕等言伏見中書門下章仇兼瓊奏稱吐蕃數萬圍逼

于城皆遵奉九重決勝萬里 臣聞雷之震者可以破山風

之威者可以蕩海伏惟陛下允答天地不應鬼神吸之而

百川却流吹之而萬物倒植是以暨勞貔武一掃戎荒高

屋用 疑於建瓴鈇戈申於破竹豈云懷縣獨有獲嘉何止

絳城復稱聞喜光風動處草樹為之欣榮晴天轉時日月

為之融朗况 臣等分官寄切報國身輕蹈舞徘徊恐門庭

之地窄詠歌踴躍賀邦家之慶深無任欣悅豁快之至謹

奉朝堂奉表陳賀以聞

為宰相賀檀 一作州界破奚賊表 玄宗

孫逖

臣等今月二十五日於易州所奏事陛下顧謂臣曰朝夕

之間諸軍當有捷書至臣等愚淺莫測天心不逾數日張

守珪果奏副將安祿山於檀州界破奚賊擒生斬級并獲

馬計至數千定期不差於晷刻指事有同於符契聖惟廣

運神以知來微妙之言自成於繫象玄通之術不假於著

龜精義難名前古未有臣等何幸親覩明徵驚喜之誠抃

躍交集伏望宣示朝列兼付史官式昭德音永用垂範無

任喜慶之至謹奉表陳賀以聞

為宰相賀破吐蕃并慶雲見表

玄宗

前人

天寶元年

臣等比見吐蕃舉國徵兵向二十萬掘壕置柵攻逼定戎城頃因奏事陛下謂臣等曰吐蕃雖衆當即破亡計日之間捷書必至昨見皇甫惟明奏破定戎城下吐蕃賊二十萬衆并斬獲大將論莽布支頭隨狀奉進又初與賊相遇西風甚急及交鋒之後便至風迴既掃妖氛兼有慶雲見者臣聞天之討一作罰罪俟盈貫而方誅聖無不通匪常情之所及伏以一戎凶醜久負恩信敢踰絕漠來犯邊城舉國興師二十餘萬經時固守八十餘日蟻聚蛇伏狼顧鴟張據便地之井泉逼懸軍之塹壘雖逆順曲直本無敵於主師而衆寡安危難預卜於人事自朝及野能不憂虞陛下神算無方睿謀先覺料此狂寇必合敗亡決秘策於禁中落奇兵於天下應期撲滅萬里廓清天聲所振已讐一作聞於四海虜將之首又懸於北闕事均符契理絕名言况合戰之時則返風破敵決勝之後則卿雲藹空大塊資其殺氣輪困表其休色實惟聖感詎測神功凡在庶寮不勝抃躍况於一作在臣等倍萬恒品一作情無任慶快之至謹奉表陳賀以聞

為宰相賀九姓斬送突厥首表

玄宗

前人

天寶三載

臣等伏見王忠嗣奏九姓拔悉密等斬突厥可汗首送至朔方軍者伏以北虜孔熾其來自久憑險恃遠干紀亂常雖聖德撫和約為父子之國而野心凶獷不改豺狼之性

既盈稔貫自速天誅頃歲已來頻貽喪敗酋豪向化雖已
歸降默啜迷恩尚為潛竄苟合餘燼偷安絕漠陛下聖慮
先覺神謀獨斷使其種類自至携離咸革面於塞垣遂傳
首於軍壘以狄攻狄寧勞六月之師有征無戰豈待三年
之克永罷邊圻遂清虜庭斬蚩尤而莫儔戮防風而何有
豈惟率土無外用表於昌期固亦先天不違更彰於睿筭
凡曰士庶不勝慶悅况在臣等倍百恒情無任抃躍之至
謹奉表陳賀以聞

為宰相賀匈奴來降表

玄宗

前人

臣等伏以匈奴患邊其來自久頃雖朝廷示信約為父子
之國然而戎狄無親常畜豺狼之志陛下聖謀廣運睿略

玄通至道昭感神明叶贊不勞一卒不瑣一兵使其種落
自相携貳今葉護敗亡殞身漠北妻子縲繫為俘闕下巢
傾席卷瓦解雲散萬里無事二庭遂空曠古不賓盡為臣
僕普天所覆皆入封疆諒由負德背恩自速天亡之禍固
亦休兵偃甲用彰海晏之期實有無方之神寧惟不戰之
勝求諸載籍所未嘗聞臣等幸遇昌期欣逢大慶忝居近
密實倍恒情無任抃躍之至謹奉表陳賀以聞仍望宣付
史官兼示中外

為宰相賀隴右破吐蕃表

玄宗

前人
天寶元年

臣等先在城中因奏事陛下謂臣等曰朕料至重陽已來
諸軍必頻剋捷臣等欽承聖旨詎測神功近者隴古果奏

斬獲莽布支并生擒蘇毗王及鑿駕將廻劍南節度使章
仇兼瓊又奏西山將士分爲五道破吐蕃城保鎮柵等四
十餘所四鎮節度馬靈察又奏破吐蕃不可勝數并開護
密識匿等數國共爲邊捍者數旬之間一作內三方告捷應
如影響合若符契禁暴如武盡決於宸衷知來似神更超
於繫表斬級獲醜陷陣隳城分南方之五將舉無遺策道
西城之諸蕃仍爲外蔽百戰百勝以夷攻夷高居九重懸
料萬里所以彰睿略之天贊知大戎之日蹙臣等忝陪巡
幸預奉德音踴躍之誠實倍恒品無任欣慶之至謹奉表
陳賀以聞

李採訪賀收西京表

肅宗

常袞 至德二載

臣聞夏曆其昌羿何逃罪漢維旣振恭亦伏誅伏惟皇
陛下恢正皇綱光膺帝業日月照其明略雷霆發其英斷
極橫流而方割撲燎火之已焚頃者胡羯亂常嶠函失守
暴殄天物憑陵帝京上皇興避狄之仁陛下有蒙塵之難
賴宸衷果決睿筭昭宣憤陵寢之懃蘇悲黎元之塗炭必
將嘗膽誓使然濟不有殷憂何以啓中興之盛業不有患
難何以彰撥亂之英哲步自郇邠至于朔漠撫巡城邑招
致甲兵誥命俯臨三讓而登九五師徒走集一呼而踰百
萬設壇拜將虛左迎師臨朝有怵惕之容率土下哀痛之
詔六軍之號令旣肅萬人之賞罰且明湯火不辭矢石何
懼及清秋戒節太白方高爰整軍容順乎殺氣龔行天罰

掃彼妖氛千里貔武之營百里龍蛇之陣沸若雲海聚如
 雪山壘揭終峯塹迴渭水闕軍聲而丘陵歛盪煬兵氣而
 天地晦冥蠢茲兇徒猶敢旅拒鼓譟白刃來聚犬羊之群
 旗靡黃塵旋就鯨鯢之戮渠魁不漏噍類無遺枝梧者面
 縛中軍顛背者頭懸後殿敗符融於肥水白可慙功破王
 邑於崑陽未云快意遂封尸於京觀旋振旅於王城啓闕
 千門掃除九陌拔羶腥於宮闕洗毒螫於閭閻者艾歡迎
 又思周德衣冠兩泣還觀漢儀謳吟變噢咻之聲氣象迴
 嚴疑之慘廓丹霄以瞻羽衛肅黃道而復鑿與正寶位於
 北辰道光主鬯迎上皇於西蜀歡展奉親永惟宗社之靈
 寶荷乾坤之慶臣忝陪宗室喜萬恒情無任踴躍歡抃之

至謹奉表陳賀以聞

為江淮都統使賀田神功平劉展表

肅宗

獨孤及

上元二年

臣某言得田神功等狀稱官軍以正月二十六日過江大
 破賊衆擒元惡於蒜山之下凶殘撲滅江介無事臣某誠
 歡誠喜頓首頓首臣聞四時成歲秋實集作司殺聖人則
 之以作五兵蓋姦宄寇賊或乘釁而起干戈弧矢亦有時
 而動自陛下率遏亂略再造區宇櫓槍旬始竹破瓦解最
 爾徃狡敢干天誅作為蛇地荐食江漢乃誣矯我詔集作
 命攘竊我王師暴殄我城邑倣擾我邊鄙荆吳之人若墜
 泉谷萬姓業業云我集作無所陛下神聰不測睿筭無方

將欲擒之必固縱之先侈其心而厚其毒然後制勝兩楹之下授略千里之外使神功等一戰而陷陣甫戰而逐北

三戰而擒其渠魁繫頸以索覆巢傾郊集作刮野掃地如

洌風之破駭浪嚴霜之墜集作落葉浹衣之內平陽州定

淮南下東方收三吳流亡者復故業塗炭者返壽域扇以

皇風與之更始遂令東土耆舊復見漢官威儀非陛下乃

武乃文之洪烈日用不知之玄化孰能陰騭聖功如此神

集作速臣無任慶抃之至

為江淮都統使奏破劉展兵捷書表肅宗前人二年

臣聞聖人之生不能使大盜不起故唐虞集作堯之代時則

有四凶之集作列王制所以誅不恪討不庭小者市朝太

者原野姦宄草竊何代無之劉展包藏禍心為日久矣集作

固敢恣姦慝乘間阻兵長驅凶徒掩臣未備以偽言亂衆

謂天命在已於是豕食淮泗鯨吞荆楚集作吳之心使黎

庶播越人神憤怒臣職司靖難敢不戮力將集作當憑廟略

以殄寇讐謹遣副使少府少監攝侍御史臣李藏用屯兵

杭州伺隙進討且分據隘害以遏其唐突賊衆徂于初役

驕舞輕脫集作師輕而驕不虞我軍能折其銳也乃以今月三日

使其偽將軍張翰朱德裕集作法雲一作德容等領步兵集作卒七千

馬兵六百徑入杭州東門焚燒閭閻鼓譟而進藏用引其

精卒設伏險集作於途羸師張之使入死地然後整堂堂之

陣以薄其壘使左廂兵馬使前澤州長史李澄為左軍左

第集作一將張巖光先鋒將李強李陵等佐之都押衙高

幹為右軍左押衙楊履和都虞候魏守寂佐之左弟集作

二將皇甫山栖左三將梁朝康承寂左四將吳季之李楚

玉顏光胤等督遊軍之騎以彌縫其闕表裏合戰竒正夾

攻以將帥之餘勇因黎元之積憤奮皆敢死登必爭先赤

羽交而三軍風生金鼓鳴而萬夫氣作自卯至午覆而敗

之神扶電掃雷落山破雉類無餘隻輪莫反鋒鏑之血朱

殷長江甲齊崇山尸作京觀實賴陛下聰明齊聖與日月

合照故能慮圖發於罇俎而威靈加於遠方使臣等盡敵

如拾芥成功如抵集作掌惡氣沴禳掃蕩無日海隅蒼生

比屋何幸無任慶快之至

為江東節度使奏破餘姚草賊龔厲捷書表

前人

臣聞皇天分時秋為司殺王者立極兵以禁暴唐虞有共

工二苗集作之患殷周有鬼方昆夷之戰蓋蠻夷猾夏自

古有之自頃胡寇作逆吳越震恐龔厲父子乘間起兵劫

明州之人畧餘姚之地負隘後篇作險海口憑陵江干蟻

聚偷安蠶食取集作給屬王師北伐未遑南征迨茲二年

春集作侵掠益甚將擬得集作東甌故地窺南越僭跡邊邑

黎庶為之騷然臣方荷推轂之寄懷盡敵之計思所以扶

乘天威圖制遠略料其今而無整勇而無剛鳥散獸聚不

是當堂堂之陣山濬海後篇匿不足用栢栢之師難以力

制易以計滅臣遂遣軍討潘景蘭領輜馱數十輩偽為商

旅傍山谷往來以餌之又遣軍將呂道光領陌集作相刀手

一百人取其便道為伏以待之遣軍將左璋率弩手一百

五十人為左翼軍將後篇作將軍余能變率弩手一百五十人

為右翼皆三吳良家百越勁卒爭賢餘勇樂於公戰蓬頭

突鬢炎集作焮駭火烈相為輔車當集作夾敵之路又遣軍將

張思覽率陌集作刀手二集作一百人為中軍操中權之制

以節其進退以三月二十九日至青煙洞口果如臣策賊

遂出山先者遇伏鼓噪合戰於是奇正後篇作兵畢舉四軍夾

攻賊眾奪氣不知所守鳴鞞雷動飛鏑雨集轉戰數集作四

十里殺其三百餘人龔厲尚稽天誅且偷畧刻收合餘燼

八九十人更登高岡背勇借一集作勢張思覽等連弩並集作

亂發引軍合圍天聲揚而勇士勵銳氣作而妖星隕遂斬

元兇父子擒其妻孥餘黨僵仆原隰脂膏草莽猶恐蔣演

齷齪尚有伏姦遂攬山搜谷刮野掃地傾其巢窟返旆而

旋累載逋誅一朝撲滅非陛下聖謨神策與天合契制勝

兩楹加威後篇作威加四海則安能剪豺狼如拉朽掃檣槍如

後篇作同拾芥使吳越又安江漢澄廓臣授鉞未幾覩茲後篇作同

成功無任慶抃之至謹差攝福州泉州山府別將左璋奉捷

書以聞并齎逆賊父子頭奉獻伏望後篇作請懸之藁街以示

百姓其餘首級於當州梟示訖所獲賊物各令分賞將士

器械官收山海餘妖自取誅滅既非強敵不足叙功謹錄

壽

奏聞

此篇又 六百八十四卷今已削去

賀表修破賊表 代宗

前人 寶應二年

臣某等言 臣 等伏見河南副元帥行軍司馬太子右庶子

兼御史中丞袁恹露布奏今年五月十七日破石埭城賊

方清并降烏石山賊陳莊等徒黨二萬五千五百人者 臣

聞聖人之生不能使大盜不起故唐虞之代時則有三苗

之師姦宄草竊為患舊矣山賊方清等最爾狂狡敢干天

誅聚輕剽之徒謂險遠可恃作為蛇豕以荐食勾吳乃有

跨據大江吞噬東土之計七州之地人罷物弊 集作耕織 百姓

業業全活無所陛下方銳志於偃武不得已而用師乃命

將授略使先勝後戰故恹等後不再舉而用有成績巢窟

皆傾俾無遺類詿誤之輩得返故業汙俗更始流人汽康

此三代之舉也非陛下齊聖格天文思柔遠豈能底綏盜

亂如此其速 臣 等幸覩成功不勝大慶 臣 無任抃躍之至

文苑英華卷第五百六十六

文苑英華卷第五百六十七

表十五

賀捷二

為百寮賀僕固懷恩死并諸道破賊表一首

為崔大夫賀破吐蕃表一首

賀郭子儀破吐蕃表一首

賀擒周智光表一首

賀劔南破西蕃表一首

賀破山南賊表一首

為崔中丞賀討田承嗣表一首

賀張獻恭破賊表一首

賀收涇州表一首

賀破賊表一首

賀破吐蕃表一首

賀劍南奏破吐蕃表一首

中書門下賀雲南軍破吐蕃劍山保定城表一首

中書門下賀元誼李文通出洛州城表一首

中書門下賀汴州擒李廼表一首

中書門下賀靈武破吐蕃表一首

中書門下賀蔡州破賊表一首

賀蔡州破賊表一首

為百寮賀僕固懷恩死并諸道破賊表代宗末泰元年

臣某等言臣伏聞逆賊僕固懷恩以去月九日死於靈州

鳴沙縣又見成德軍節度使李寶臣露布斬逆賊蔚州刺

史曹楚王并破党項部落收諸蕃漢官兵捷一作及百姓

三萬餘衆又邠寧節度使白孝德破僕固瑒下兵馬及吐

蕃斬首三千級生擒一百九十五人獲馬八百疋兼鳳翔

節度使李抱玉亦破吐蕃羌渾等三千餘衆收其軍資器

械不可勝數者臣聞積德者天之所啓反道者鬼得而誅

逆賊懷恩者羶裘雜種出身微賤陛下以其久經驅策嘗

立功勳任以樞機一作中樞升之上將而豺狼其性梟獍其

為心連結西蕃因依北虜大為人患二年于茲謂旅拒可

以偷生徇狂可以集事曾不知逆天暴物其惡貫盈故王

師未加而元兇自斃又曹楚王去順効逆與之連衡更唱

迭和同為不道李寶臣恭行天罰遂戮鯨鯢其餘吐蕃之

兵羗渾之旅或毆役邠土或陵逼鳳翔白孝德陷之於前
李抱王破之於後既已剪其兩翼方且覆其全軍信宿一作
開之間數道皆捷彼進無所入退無所從殄掃妖羣指期
非遠臣歷考近事因知天意自祿山開釁思明亂常迄于
懷恩三凶繼跡始雖倣擾旋見敗亡社稷危而復安天地
否而重泰足明皇穹保佑曆數延長卜年之慶永代無極
臣等幸逢昌運忝列朝行慶躍之誠倍萬恒品無任歡抃
之至

為崔大夫賀破吐蕃表代宗

浩虛舟永泰元年

臣某言伏見關內河東副元帥朔方節度使司徒兼中書
令汾陽郡王郭子儀八月日奏狀今日日先軍李懷光於

鹽州界大破吐蕃及吐谷渾賊一萬餘眾獲馬六千七百
五十疋牛羊器械未知定數者臣聞戎狄無厭厚將自斃
兇殘不革舉必生擒惟此犬羊屢侵壇場陛下頃雖遣將
猶命緩追冀承含育之恩以變貪婪之性今乃先時入塞
乘間犯邊鬼得而誅人皆自戰偏師暫出舉眾大奔係彼
牛馬獲其生級數逾萬計威攝四夷陛下神化無方聖功
潛被資於秘畧成此殊勳臣承恩入朝次行分陝雖捷書
傳慶已竊抃於道一作中而賀表陳誠願先馳於闕下無
任之至

賀郭子儀破吐蕃表代宗

于邵永泰元年

臣某言今日吳承倩至奉宣進止示臣關內河東副元帥

司徒兼中書令汾陽王郭子儀奏捷狀李懷光於監州界積石川大破吐蕃一萬餘衆生擒斬首共六千餘級獲牛馬及器械不可勝數者伏以聖畧遠加制勝前定神功不測告捷如期吐蕃忘國厚恩歲犯邊境陛下料其進退知其無策親以規模授於諸將以鹽夏之路地曠人稀嘗語臣曰此賊秋中必來擾鹽夏今覩成擒之處果於所料之中俘馘既多羊馬甚衆此皆宸心懸照不差毫髮天威遠被克壯師徒遂令智勇雲起妖氛電掃合符聖斷有此豐功子儀狀云又許日追蹤必當再捷者臣以蕃醜久逋聖誅從此氣衰必當瓦解坐視無外之慶載美即叙之勳能并可期哉戈有望親承睿筭勿心驗於今奉觀戎捷不勝慶

之至

賀擒周智光表 代宗

獨孤受 末秦二年

臣等言臣聞征而無戰者王者之師也將而必誅者春秋之義也臣伏見周智光傲狠頑虐昏迷猖獗集作敢專生殺之威以慢王度崇飾姦慝之志自干天誅陛下謂罪在已躬視人如子求言式遏之義不得已而用師而將纔受鉞兵未血刃已梟元惡之首載安舊汚之俗昔漢征黠布望塵集作陣而憂殷伐鬼方積年乃克豈若陛下朝命將帥夕殲渠魁制勝神速從右未有臣等不勝慶快之至

賀劔南破西蕃表 代宗

常袞 大曆十年

臣某言今日伏見劔南西川節度使崔寧所奏露布十一

月七日於劔南大破吐蕃斬首八千五百級生擒九百四
十二人獲馬牛器械一千萬計者陛下以西戎負恩連歲
設備近興武旅遠鑠王師故隴上或虞邛南每捷事同符
契謀動鬼神凡在臣庶不勝慶快伏以西蜀一隅大戎乘
隙聖謀潛運藩帥龔行以我同力出其不意故得邊兵無
遺鏃之費狂寇有一作致輿尸之凶名王首將旣充俘馘要
塞堅城亦入封守神武之德莫測掃除之勢足徵天聲一
臨風動萬國則方隅不擾候我綏懷夷夏大同期於指掌
臣等觀茲大捷愧乏嘉謀慶躍之誠實倍恒品

賀破山南賊表

代宗

前人

臣某言中使某至示臣山南西道露布破吐蕃高安堡五

百人又生擒堡使等七人又破急援兵馬二千餘人者大

獲帥長驅其畜牧焚其資儲夷其堡隊獲親慶捷喜倍

一作

萬恒情臣伏以秋成以來羣帥宣力陛下皆先授方畧合

如符契以蕃醜東寇猶窺疆場受命獻恭掩征巢穴允膺

密旨精擇奇鋒行於險中出其料外遂使恃固之壘遽復

于隍將領之渠盡衿其甲猶不悔禍更招援軍以犬羊恃

衆之羣當貔武輕齎之旅雖終日猶關鐵耗相仍而乘夕

盡逝覆亡不暇聖謀方舉西候遂寧神筭旣行北郊以靖

遠周萬里之外甫料四夷之情中詔是闕所征皆捷苟承

成命皆可指期故叩道拜章於前漢池拜章於後復畱睿

畧更布新書軍中皆必勝之師天下無不賓之虜臣幸參

樞近更乏嘉猷拜舞失容以慙以賀

為崔中丞賀討回承嗣表

代宗

大曆十一年

臣某言中使某至奉宣某月日勅承嗣本輔逆臣罪當三夷陛下垂包荒之德開自新之路假以台衮冀其悛革豈謂豺狼之心飽而增兇動搖隣境慢易君命天下臣子雖扼腕攘臂願食其肉畏懼陛下不敢自發今陛下殷然震雷霆之怒下誅購之令戴髮橫目莫不憤激臣受國恩守在遠藩不得驅策駑蹇列於將臣巨猾之首竟為他斷撫劍慙耻心竄馳越臣又知鯨鯢既盡蜂蠆自滅陛下垂衣裳以臨萬邦無為之政行同一作大舜無任慶快感憤之

望

賀張獻恭破賊表

代宗

臣某言今月中使某至伏蒙聖恩宣示南山山西道節度使檢校工部尚書張獻恭所奏露布破岷州吐蕃十萬餘衆生擒百餘人并獲牛馬及燒焚賊倉庫甲仗並盡者伏以吐蕃背恩負約屢擾邊陲惡稔福盈自招喪敗聖謀潛運尅捷相仍自秋已來制勝非一頃則收功朔北今又獻凱山南皆陛下指受規模尅期進取遂令銜命之將感義之徒伏順爭先奉詞掩襲未鼓而收城壘既戰而殲寇戎策備火攻威同電掃迴軍乘勝又破柘川殺獲追擒不可勝數嘯聚之黨今已戮除唯類之餘自當殄滅廓清右地計日可期斯實皇威遠覃睿畧先定動罔遺策舉必有功臣

文苑英華 卷之七
謬踐台陛親承睿筭無任踴躍之至

賀收涇州表 德宗

常衮 建中元年

臣某言中使王開諫李重芝等至伏奉勅旨送吐火羅王子并曹義臣家口共四十四人配漳泉等州安置伏聞大破兇醜收復涇州梟斬帥劉元等傳送闕下餘黨悉降西睡底定九在臣庶不勝慶悛臣聞聖人有作神契必先用彰睿謀小有邊患以威天下大告武成因茲斬效疑罔不率俾伏惟聖神文武皇帝陛下德合天地明罰以法雷霆道符炎黃有征以懲姦宄蠢茲狂狡敢拒封圻梟獍之心不知恩愛豺狼之性輒肆傷殘聖慈以玄造曲成神武不殺時寬嚴旨頗許自新益用恣睢竟無悛革然夏后之征

虜氏召六卿以龔行周文之伐密人示萬邦以整旅咸在侯甸之內亦効訓誓之勤於是戎用張親授經畧而執迷不復雖困猶闢暫假游氛尚稽靈誅皇赫斯怒天威震耀簡車馬以大閱命將帥以長驅飛舞梯衝輒臨壁壘竟徒悚慄義士激昂梟懸渠魁檻送支黨上以告清廟下以布遐方人神豁憤朝野大慶百二之塞外虞解嚴十萬之師餘勇可息則日月所照敢不來庭戎夏大同期於指掌臣謬承重寄喜萬恒情無任慶躍之至謹奉表陳賀以聞

賀破賊表 德宗

于邵 興元元年

臣某言臣聞春生秋殺天之令也撫順討逆國之教也故王者上法震耀下脩典刑雖當垂拱之朝亦整干戈之用

伏見今月十日神策行營節度使尚牙孤破藍田賊保生
擒賊僞署御史大夫仇敬忠斬獲共二千餘人者初從摩
壘旋即合圍因乘破竹之威不漏枯池之網中賀伏惟皇
帝陛下聲教以文暢禍亂以武戮奄有華夏光臨統曆日
者蕞爾朱泚怙亂涇原腥穢宮闕僭賊神器陰連叛將竊
緩輿屍實由逆賊仇忠敬等姦克相資狡惡爲事因山據
嶽欲抗雷霆之誅積粟稅一作芻糞延晷刻之命殊不知
天威不遠睿筭何逃未終瘳狗之在已觸駭駭之勢餘克
奪魄義衆增威掃氛侵於順風風復京師於不日臣謬兼統
帥濫一作總禁戎矢石不親虛當坐制之地克渠尚在終
决前驅之心無任慶快之至

賀破吐蕃表

德宗

齊狀

臣某言伏聞南蠻以六月某日大破吐蕃弄視等城擒戮
俘獲不可勝計者臣聞德之所綏在遠咸服義之所棄雖
暴必亡蠡茲大戎敢肆兇戾久稽天討時動邊塵人神共
讐夷夏同憤遂使南蠻奮旅仗義爭先覆其保障之時奪
彼肥饒之地斬馘萬級俘計千羣揚天聲於區外正王畧
於殊俗自非陛下道超帝圖化協神用武先七德守在四
夷安得使百蠻稽服潛被聲教始左衽以請吏俄倒戈而
効誠捨其唇齒之資爲我爪牙之用雖書稱即叙時美來
威方之聖功彼有慙德臣謬膺朝寄待位東土不獲隨例
稱慶闕庭抃躍之誠倍萬恒品不勝之至

賀劔南奏破吐蕃表 德宗

令狐楚

臣某言當道進奏院狀報六月某日劔南節度使韋臯狀
 奏破吐蕃五千餘衆生擒大酋官七人陣上殺一百五十
 餘人收獲牛馬四百餘頭疋噐械一千五百餘事者吉語
 遠及歡聲相接 中賀 臣聞順實臣道伏頭者至柔而全禮
 爲天經無禮者雖衆必敗陛下君臨萬國天覆兆人恩覃
 于幽微澤及乎荒遠蠢茲蕃醜假息西陲惟天地含弘之
 心未能剪滅以豺狼貪戾之性輒欲 一作陸梁爰整其師
 不攻而取此皆降睿畧於天上頒明謀於閩外制士之死
 命得人之歡心所以殪戎如羊破虜如蝨毆彼牛馬獲其
 侯王威加于殊域武暢于羣動自然赤山之壤可蹈清海
 之波可涉必當封土刻石以垂天聲戎臣司武獲觀其
 不勝歡抃之至

中書門下賀雲南軍破吐蕃劍山保定城表 德宗

權德輿

臣某言伏見劔南西川節度使某官某所奏兵馬使宋晃
 前月十八日與雲南軍合勢攻破吐蕃劍山保定城當日
 斬城使者伏以聲教所被遐邇大同蠢茲西戎尚有遺類
 或犯亭鄣且稽靈誅陛下睿筭無窮天威遠震以夷裔感
 恩之衆佐藩隅制勝之臣取以多方累獻戎捷事皆前定
 必稟聖謀 集作 斬將舉旗出於料外堅城便地盡落彀中
 通荒服會朝之途絕餘孽窺覩之際奉威懷之命以律而

滅兼夷夏之師在和而克此皆陛下神武潛運妖氛永清
由是成擒自當盡敵臣等謬當樞近媿乏廟謀幸觀成功
不勝大慶無任欣抃之至謹奉表陳賀以聞

貞元元年十一月三日

中書門下賀元誼李文通出洛州城表

德宗

前人

臣某言臣等今日面奉進止元誼李文通等蒙恩宥過以
今月七日將領將士出洛州城者伏惟皇帝陛下聖神之
化懷保元元仁洽好生感深格物誼等列於守將本以忠
勞師旅之間失於慮始蒼黃之際自謂匪人士吏危疑謀
猷廻適陛下以震耀所及殺傷則多曲成以誘其衷持久
以通其變愀然軫念不忍致誅待以初心許之遷善指其
開壁率衆來朝實賴亭毒之恩再全臣子之節宥茲一眚

昭示萬方睿慈所弘動植知幸臣等虛薄備位台司愧無
調鼎之能獲覩止戈之慶無任欣抃踴躍之至謹奉表陳
賀以聞

貞觀十二年正月十三日

中書門下賀汴州擒李迺表

德宗

前人

臣某言中使某乙奉宣進止汴州以今月三日擒送李迺
軍州並已寧帖者伏以聖德含弘在宥天下而匪人醜類
自抵刑章李迺本以庸微謬從軍校潛懷狂戾輒擾師從
乘其疾病坐邀職秩怙亂以逞志專戮以作威人思納忠
義不同惡俄就械繫一方晏然雖梟鏡之心暫求假息而
膺鷗之逐曾不崇朝衆情交欣以待朝旨陛下命將相之
重撫按是邦明書罪人且示輕典成命方下浚郊以清聖

文苑英華 卷一百二十七
謨炳然若合符契足使義士勵節貪夫革心稟化畏威無
有遠近集作臣等繆居台鉉每奉德音愧乏嘉猷以承睿

畧無任懽忻慶幸之至謹奉表陳賀以聞貞元十二年七月九日

中書門下賀靈武破吐蕃表 前人

臣某等言臣等今日面奉德音靈武大破吐蕃擒生斬將
者伏以睿謀武經陰騭上畧兵符所授攻戰多方蠢茲犬
羊尚勞燿燧羣師稟命中權戒嚴掎角相因初設險於三
覆竒正合發俄獻功於七擒數酋渠之首級積戎械於亭
侯勝氣餘勇鼓行無前即叙可期有征斯在臣等繆居樞
掖莫效消埃每承以律之貞空荷止戈之運無任慶快踴
躍之至謹奉表陳賀以聞貞元十四年十月二十九日

中書門下賀蔡州破賊表德宗 前人

臣某等言伏奉宣示蔡州行營招討使韓全義所奏云四
月二十七日於逆賊吳少誠界破賊驪子及馬步軍三千
餘人賊弟吳少陽棄衆奔遁者伏惟陛下聖神廣運丕冒
萬方而顛越匪彞自蹈鋒刃德音累降曉告不悛禁暴安
人酌於軍志命師授律發於宸心整旅有嚴拊循決勝據
便地以三覆分銳師而九攻材官突騎奮勵精勇啓行所
及莫敢枝梧奔北之徒自相蹈藉威謀克壯殺獲斯多更
俟便宜續圖攻取蒙輪超乘靡不賈餘長穀鈎援期於盡
殪此皆睿筭前定純臣協心佇清淮瀆以慶天下臣等繆
居樞近喜倍集作恒情無任欣抃踴躍之至謹奉表陳賀

以聞 貞元十六年五月四日

賀蔡州破賊表 德宗

張仲素

臣某言伏聞蔡州營田招討 一作招討行營 韓全義今日某日大

破賊軍斬首擒生其數至廣 臣某中賀 臣聞天覆至大負慝者

必降雷電之討君恩至重失節者須示斧鉞之誅賊臣吳

少誠輒因將帥之權遂肆豺狼之性聖恩含忍久示招誘

敢固執迷未即歸罪今金我親承睿旨度稟聖謨整師臨

境羣兇授首梟斬元惡計日可期廓清淮濱在茲一舉臣

謬忝地官之職情同率土之歡欣快之誠倍百常品無任

踴躍之至

賀靈武破吐蕃表 德宗

令狐楚

臣某言臣得朔方節度使李樂牒稱十一月二十日大破

吐蕃者千里喧傳三軍快抃臣某誠歡誠喜頓首頓首臣

聞天生四夷用別荒服國有二柄誰能去兵伏惟陛下臣

妾兆人庭衢六合溟波靜息車軌混同萬里清平三分底

定而吐蕃羶臊醜類狂狡陰計乘陵凍草妄竊邊疆相鼠

無牙安能穿屋羝羊羸角徒欲觸藩是以神聖啓其將心

忠勇成於士力兵旣落於天上虜乃 一作果 陷於穀中箝口

之馬僨車而繫者千蹄 一作敷 辮髮之人為俘輿死者萬指

降旗載路棄甲蒲野遙知水赤坐想風腥此皆宗社儲靈

朝廷決策破碎戎膽振騰天威凡百人臣不勝踴躍臣某

未申絲髮謬總旗旌欣歡憤激倍萬恒品所守有限不獲

稱慶

此表合在本卷令狐楚賀劔南吐蕃之後元誤入六百三十七卷賀狀內今移附卷末

文苑英華卷第五百六十七

文苑英華卷第五百六十八

表十六

賀捷三

賀梟戮叛將楊惠琳表一首

賀收劔門表一首

賀李侍郎收成都表一首

賀破賊表一首

賀捉獲劉闢等表一首

代李尚書賀生擒李錡表一首

賀收蔡州表一首

賀誅吳元濟表一首

賀平淄青表一首

為宰相賀殺賊表一首

賀汴州誅李介表一首

賀平党項表一首

賀生擒衛州草賊鄧裴表一首

為滎陽公賀幽州破奚寇表一首

賀梟賊叛將楊惠琳表 憲宗

楊於陵 元和

臣某言臣得當道進奏官高振報夏州叛將楊惠琳庸賊

匹夫兇頑習性憑依壁壘竊弄干戈陷我邊鄙之人將流

蜂蠆之毒伏惟陛下道包唐虞一作威貫風雷乃命戎人

恭行討罰文告纒布已見其携離天誅未加倏從於梟戮

革車不填餽餉靡勞宸筭不遺於指蹤王師蓋本於無戰

雖巴庸醜類樂禍一隅顧其巢幕之危因同破竹之勢妖

氛坐掃仁壽可期臣職忝藩條任分師旅遠承慶捷倍萬

恒情無任踴躍之至

賀收劔門表 憲宗

前人 元和

臣某言伏見正月二十九日制書以劉關擢於非次授任

節旄不立朝章擅有侵軼詔命左右神策行營節度使高

崇文領馬步將士嚴礪李庸等計會討伐臣又得上都進

奏院官高振報嚴礪下告捷官嚴公貺奏正月二十二一作

三日收復劔門破賊五千斬偽授劔州刺史武德昭訖又

夏州叛將楊惠琳援絕城孤勢窮力屈王師進襲計已剋

平凡在遠邇不勝慶幸某中賀伏惟皇帝陛下誕敷玄德廣

被文明寰海又寧戎夷欵附最爾狂狡敢縱姦克藉方伯
任用之資乘軍城變故之際阻兵拒命肆虐讐鄰陛下志
在安人尚為含垢頃令申諭許以自新誠宜改過感恩迷
而知一作非復而乃恣情干紀長惡不悛既慝稔而禍盈俾
人怨而神怒今戎臣授律睿畧遐宣迫脅者知有所歸忠
義者得以自効因利乘勝犄角攻驅固無遺鏃之勞佇見
輿尸之變臣忝職藩服授任偏師憤激之誠倍百常品無
任踴躍之至

代李侍郎賀收成都表

憲宗

呂溫

元和元年

臣某言伏見高宗文奏以九月二十二日官軍入成都府
逆賊劉闢走出見勦兵追捕者臣聞夏震秋落乃觀成物

之功善陣有征方見勝殘之理然則殺之所以生之也動

之所以綏之也氣和則歲功早就德盛則廟筭先期無遺

鏃而巨盜集作窮奔不血刃而全蜀底定奔走夷裔鼓舞

生靈騰瑞氣而躍祥風披慶雲集作而捧白日中賀伏以陛

下慕臨宸極惟新庶政拓跡開統之始作法定制之初而

賊闢敢犯天威首干大紀恃嶮與遠窮兇極暴雖禍淫助

順誠天道之必然而制勝舉全皆聖謨之自出諸軍既集

鋒鏑爭先陛下以為方暑用兵觸冒害氣與勦人而欲速

寧全衆以集作而功遲遂令緩螻蟻之誅抑貔貅之銳休養

磨礪以須秋期由是感恩而思奮者萬心如一又高崇文

疾惡太甚殺傷小一作過陛下推弔伐之義弘覆燾之慈

狂寇

集作寇逆

是誅吾人何罪遂令逐北者生致為上脅從者

獲則捨

集作免

之且諭鴻私仍加宴慰由是飲澤而向化者

十室而九加以聖慈曲被大信有孚當拱績之時賜戰士

悉出內府開食黠

集作樵

之路賞降者曾不踰辰遂使昏迷

革心義勇增氣江山自拔雷雨長驅渠魁假息而逃威士

眾順風而捨仗市不易肆巷無驚犬人蒙骨肉戶解倒懸

旌旗導長養之風金鼓動發生之氣然後知至仁能殺虜

略無方大典用彰神武可畏全苞形器

集作氣

之內有罪必

誅旁行天地之間無思不服臣繆膺重寄聖朝奉昌期坐觀

氛授之清目覩鯨鯢之戮手舞足蹈倍萬倍聖朝情無任慶抃

之至

賀破賊表

憲宗

元

素

元年

臣某言得度支使李巽與臣委曲報劔南行營官軍大破

逆賊劉闢事宜伏承自六月十日後鹿頭城下石碑谷口

前後殺獲已僅三萬餘人今月六日又於鹿頭城下殺賊

二百餘人兼奪得一柵東川節度使高崇文便於城下頓

軍又西川賊於鹿頭城投降都虞候郝同美說賊城精兵

不下數百人其餘一二千悉是子弟鹿頭城內人心亦甚

危懼計即投降又官軍出戰賊眾大敗殺傷欲盡者伏以

逆賊劉闢愚狡狂童稔蓄兇慝脇帶州邑依阻城池背誕

皇恩自貽赤族陛下曲垂弘貸念彼遠人此賊敢肆拒張

恃茲薄戍望其峻革又已稽誅一興貔武之師果盡螳螂

文苑英華 卷一百一十五
之衛今則神人共怒覆載不容玉師鼓行窮寇席卷傾枳
棘之巢待擒妖鳥决潢汙之水以捕涸鱗揚旆整戈指期
剪滅此實聖德遐被神武昭宣岷蜀清寧當候旬日凡在
臣子孰不歡心某忝荷鴻私謬承朝寄無任慶快之至

賀捉獲劉闢等表

憲宗

前人

元和元年

臣某言得進奏官報狀伏承九月某日高崇文差馬使鄜
定進於彭州界捉到劉闢盧文若并家口等有詔罪劉闢
及生擒外餘一切不問西川減放兩稅并割西川六州與
東川者臣聞鬼方不賓高宗用討防風後至夏禹行誅自
古聖帝明王將欲上平泰階下齊萬國未有不先正刑罰
後致雍熙者也闢構亂阻兵違天背順聚茲蜴蜥固彼幽

還謂天可逃無罪不肆陛下斷於睿略與此神兵寇壘妖
鋒颺馳電掃顧茲劇賊尚敢退藏同惡相携偷生遁孽灌
莽雖深豈網羅之能避武夫多力已梟鏡而同擒萬里喧
傳兆人鼓舞刑當磔裂罪合誅夷肆市陳京纔攄衆怒自
陛下握乾御曆授錄纂圖玉燭載和金鏡愈朗至於夏州
倣擾蜀郡亂常春斬惠琳冬擒劉闢神速之効從古所無
復霽整旅之威降納汙之詔滔天作逆唯罪一身念兩川
徃後之勤爰矜賦稅割六州版圖之屬以定封疆日月發
一作 其貞暉山澤通其喜氣凡在率土孰不歡康臣謬沐
殊私叨承重寄手舞足蹈倍萬恒情無任慶抃之至

代李尚書賀生擒李錡表

憲宗

呂溫

元和二年

臣某言臣得某官某乙狀報伏承今月十二集作十三日夜浙

西將士張子良將相率効順生擒李錡者天討有罪國無

稽誅夷夏同歡飛沉咸躍臣某中賀臣聞炎氣方蒸伏陰不

能藏其沴必疑戰發泄以彰正陽之功至化方融大姦無

所集作隱其慝必陵犯誅夷以耀聖人之武沴不盡消生

德不遂姦不盡發聖功不成蓋自然之明徵而必至之恒

理伏惟皇帝陛下光膺駿命恢纂鴻休仁育群生義征不

諛無與讓而誕修文德不得已而有此武功日者周歲之

間大刑再舉朔陞叛將獻首於九廟之庭益部克渠伏鑕

於萬人之目被髮左衽且猶知懼肖形含氣孰不革心賊

錡身齒人倫家承國集作宗籍三朝任遇五族光輝而獨藏

禍謀密聚姦黨梟琳之牙旗尚在忽已發狂戮關之刃血

未乾敢茲拒命陛下重難戎事深愍遠人先示招諭後加

討伐方伯嚴兵有司調食經略纒下形勢已張果得義勇

叶心鬼神假手大旆迴指長戟合圍兵火之氣天運金鼓

之聲海動集作震曾不終夜遂擒元兇巷有居人市無改肆

滔天之逆踰月而平去歲西征則善陣不戰今茲東伐則

善師不陣有以見睿略天縱神武日新聖道久而揆刃皆

虛德澤深而用力彌寡從此氛集作災窮沴盡俗變風移百

蠻成冠帶之鄉五兵為耒耜之器溥天同軌比屋可封古

今一時堯舜何遠臣謬膺重寄時荷殊恩載集作再逢河海

之清三觀鯨鯢之戮志深除惡義切同休歡抃之誠倍萬

恒品無任手舞足蹈屏營之至謹奉表陳賀以聞

賀收蔡州表 憲宗

劉禹錫 元和十二年

臣某言伏見詔書以唐州節度使李愬生擒逆賊吳元濟獻浮文武百僚於興安門列班稱賀者天威遠被元惡就誅一方既平萬國咸慶賀中伏惟睿聖文武皇帝陛下德超邃古道合上玄臨御已來天人協贊削平吳蜀掃蕩塞垣軍書大同夷狄來貢最爾元濟敢懷野心輒聚犬羊苟偷時月陛下聖謨獨運睿感潛通天助神兵人生勇氣既擒克逆爰集作遂正刑書伏三紀之逋誅成九衢之壯觀宗社昭告華夷式瞻行弔伐而在禮無違烜一作振威聲而何城不尅楚氛改色淮水安流漢上疲人盡霑雨露汝南遺老

重覩昇平凡在具臣孰不欣抃臣久辭朝列忝守遐藩不獲稱慶闕庭陳露卅悃集作漁仰瞻宸極倍萬群情無任屏營之至

賀誅吳元濟表 憲宗

元植 元和十一年見集本

臣某言某月得當道節度使牒呈本州稱逆賊吳元濟已就誅斬訖臣某賀中臣聞拯遺眚於溝瀆非聖不能掃餘沴以雪霜非天不可日者神棄申蔡蓄為汙渚五十年間三后貽顧眇爾元濟繼為兇妖謂君命可逃以父死為利陛下凝茲睿筭取彼克殘不越殷宗之期遂勦淮夷之命威動區宇道光祖宗凡在生成孰不歡抃臣忝官藩翰不獲率舞闕庭瞻望徘徊無任踴躍屏營之至

賀平淄清表一首

憲宗

白居易

元和十四年

臣某言伏見二月二十二日制書逆賊李師道已就梟戮者皇靈有截睿筭無遺妖氛廓清遐邇慶幸臣某誠歡誠喜頓首臣聞亂常干紀天殛神誅李師道包藏禍心暴露逆節罪滿惡稔衆叛親離未勞師徒自取擒戮伏惟皇帝陛下文經天地武定華夷凡是猖狂無不誅剪兩河清晏四海會同清平之風實自茲集作沃始臣名叅共理職忝分憂抃舞歡呼倍萬恒品官守有限不獲稱慶闕庭無任慶快踴躍之至

為宰相賀殺賊表

穆宗

前人

臣某等言伏承某道逆賊某年某月某日已被某殺戮訖

皇靈震耀竟孽梟夷率土普天歡呼鼓舞臣某等誠喜誠

抃頓首頓首臣聞亂臣賊子阻兵干紀者明則有天討幽

則有鬼誅遲速之間罔不殲殄伏惟文武孝德皇帝陛下

君臨八表子育群生合天覆地載之德順春生秋殺之令

宿寇遺孽闐然銷亡四海九州廓然清晏逆賊某乙一介

賤隸兩河叛人包藏禍心竊弄凶器戕害主師虔劉一作剽掠

善良幕燕鼎魚偷活頃刻所謂顛木之餘枿瘡疽之遺種

重斧欲加而先折鍼石未攻而自潰不有弔伐孰知德威

不有妖氛孰知神筭則天下之耳將來集此無四字之心有以

知順逆存亡其猶影響者也臣伏以某乙既已斬首某乙

將何保身若不乞降即應生縛輔之或在車即相依皮既

不存毛將安附况我乘破竹彼繼覆車止戈之期翹足何待無任喜慶抃躍之至

賀汴州誅李介表

元稹 長慶二年

臣某言臣伏見逆賊李介已就誅夷韓克入汴州訖一方

既定率土無虞凡在臣僚實增歡抃臣某 中伏以汴州扼

吳楚之津梁扼咽喉之要地將驕卒悍易動難安急攻則

越軼 集作是 變自非陛下盡排群

議獨斷宸衷外委將臣中 集作 敷睿筭風行號令天助機

謀則何以斬此鯨鯢破茲梟鏡臣摧克志切受國恩深仰

荷威靈倍萬常品限以符守不獲稱賀闕庭無任踴躍屏

營之至

賀平党項表 宣宗

杜牧

臣某言伏奉二月二十七日勅党項剪除北邊寧靜華夏

同慶道路歡呼臣某誠慶誠抃頓首頓首伏以上天有震

耀殺戮王者有攻討誅夷是以不暫費者不久寧不一勞

者不末逸伏以自古處夷狄於中華未有不為患者春秋

時長狄攻魯北戎病齊破衛陵燕侵秦撓晉西漢趙克國

納先零於內地東朝馬文泉置當前煎於三輔自後熾大侵

亂關中戰爭十年騷擾四海凌逼京邑發掘園陵段類不

生終不能滅後至曹公因匈奴衰弱分為五部處在汾晉

散而居之元海傑然首亂華夏中原喪沒凡數百年國朝

貞觀之初突厥破滅大宗惑彥博之利口忽文貞之成筭

處其降衆置於河南不數十年果殘燕趙興師命將輸穀
饋財天下騷然始能殄滅是知古今夷狄處在中土未有
不爲亂者伏以党羗雜種本在河外生西北之勁俗稟天
地之戾氣爲西戎所蹙舉種來降國家納之置於內地爰
受冠帶兼伏征徭角餽旣成觝觸是務天寶至德之際比
燕偏重中原一掀大曆建中之時逆胡余波巨盜再起党
羗因此亦恣猖狂兔伏鳥飛爲戎虜之耳目狼心梟響作
郊畿之殘賊比以迴鶻未殄吐蕃正強且須羈縻未可重
擬於是邊疆日駭種類歲繁每至勁弓折膠重馬免乳以
魁健之質張忿鷲之亮劫饋谷以焚舟殺輶車而閑道衆
虺盤結群犬呌牙依擬深山出沒險逕近在宇下游於穀

艱難已來不能剗削伏惟聖敬文思和武光孝皇帝
天縱聖赫日資明威極風庭謀先造化潛運睿筭獨决神
機箕宿馮牙狼星欽角戊日禱馬太白揚眉按鎖而邊事
無遺聚米而兵刑盡見披其要地擣以奇兵獸窮搏人鹿
急走險囊封赤白雜沓繼來雉走檄書遠近同至蘇辛李
蔡傳鄭其陳十萬齊呼四面同入行軍猶枕席之上敗虜
於阻險之中或以利戈舂喉或以長矛挾脅僵屍積疊千
山之草木盡腥霆電轟喧萬里之威靈大震詩曰不吊昊
天亂靡有定此言中國不振蠻夷入伐下人號天以告亂
也復曰宣王薄伐小雅中興是知武功不成文德不洽皐
陶無遺之戒史佚非類之言若不殄除何爲家國自此兵

為農器華作軒車泥紫金於常山沈殘戎於青海天覆盡
得禹畫無遺統華夏為一家用夷狄為四守萬物由道百
度皆貞遠超三代之風使無一人之虐臣僻左小郡一作守非
樸散材空過流年徒生聖代尚能為詩見志作歌極情
上詠神功庶垂後代不獲稱慶闕庭無任踴躍屏營之至
謹奉表陳賀以聞

賀生擒衡州草賊鄧裴表

前人

臣某等言伏見湖南都團練使奏生擒衡州草賊鄧裴及
徒黨等伏以湖湘早耗百姓饑荒遂有姦克敢圖嘯聚今
承擒滅已盡根株臣等誠歡誠忭頓首頓首臣聞三代之
英兩漢之盛姦冗亂常之類梃克構逆之黨乘間即有遇

際便生伏以聖敬文思和武光孝皇帝陛下威極風霆德
滋雨露正開壽域盡納群生永戢干戈將臻富庶逆賊鄧
裴叢爾小孽敢因艱食漸誘饑人剝亂鄉閭陵驚郡邑徒
堅黨合事鉅寇軍或據深山或閉官道遂使湖嶺之外人
不聊生慎由指揮義徒總齊武士仰憑睿筭遠仗皇威不
經歲時盡剪豺虺党羌一作項已寧於朔北妖黨復殄於巴
西今擒鄧裴一清湖嶺用夷狄為四守統華夏為一家言
念秋毫無非帝力臣等備位台鼎日奉聖謀無任慶抃歡
呼之至

為滎陽公賀幽州破奚寇表

李商隱

臣某言臣得本道進奏官某狀報某月日幽州節度使張

仲武奏破奚北部落及諸山奚除舊奚王匿郎所管外殺
 戮首領丁壯老幼并殺獲牛羊焚燒車帳器械等計二十
 萬刺史已下面皮一百具耳二百隻奚車五百乘羊一萬
 口牛一千五百頭者天聲遠疊廟畧遐宣白虜獲於寧臺
 赤夷俘於燕路臣某中賀中臣竊窺舊史逖聽前朝有天子憂
 邊清霄輟寐將軍出塞白首言歸至乃或勝或奔一彼一
 此竟困塞郊之柝那停絕漢之烽猶欲叙烈旂常告功祧
 廟用其斃勝謂曰難能况幽朔巨都全燕重地荐臻奚寇
 猾亂華人田讓之護集作鮮卑莫能深入祭彤之軍遼水
 唯遣相攻近歲以來為患滋甚是單于偵邏之路懷駒支
 漏泄之姦張仲武重感國恩習知邊事同三師而隸楚倅
 五餌以開戎乘其囂惰之時俄得剪除之便燕犀密掛
 馬潛羈超距投石者動過千群戟手科頭者畧踰萬計坎
 三鼓而河流自却聲六校而屋瓦皆飛自使鸚懼喪林兔
 忙迷穴無舟掬指有地僵屍未驚紫陌之鳥前軍已蹙不
 淚淮山之鶴後隊仍窮遂分袁尚之頭顱仍裂蚩尤之有
 髀穹廬落燼同甲揚灰山積雲屯大收其車乘角羸耳濕
 盡獲其牛羊柳水載澄桑河無事爰施疑言語入解皇威
 此皆皇帝陛下功格上玄運膺下武授茲成筭于彼當仁
 震肅九圍歡呼萬國昔艱難云始胡塵首起於盧龍今開
 大有期而漢將先清於涿鹿人謀允若靈貺昭然固已上
 慶祖宗下光編策錄圖洪範競三古之殊猷玉檢金泥有

文苑英華 卷八 十一

百神之靈符臣雖當防遏不介邊陲空增氣於懦夫實叨
榮於下將日園千里天蓋九重奉一月之捷書唯知抃蹈
獻萬年之壽酒尚隔班行念風水於遐藩寄夢寐於宣室
無任望闕結戀之至

文苑英華卷第五百六十八

文苑英華卷第五百六十九

表十七

雜賀一

爲杭州崔使君賀尊號表一首

爲加天寶尊號表一首

賀冊尊號表一首

爲河南盧尹賀上尊號表一首

賀新樂表一首

爲雍州父老賀鑿駕停幸洛邑表一首

爲何舍人賀於梁王處見御書文表一首

爲常右相賀拜洛表一首

賀納諫表一首

為秋官員李敬仁賀聖躬新牙更生表一首
賀聖躬痊復表三首

為聖體平復御紫宸殿受朝賀表一首

為安平公華州賀聖躬痊復表一首

為杭州崔使君賀加尊號表武李嶠延載元年

臣某言伏奉五月十一日制書陛下俯順群情懋膺大典

垂光休於百代被鴻私於萬族凡在含生孰不慶幸臣某

中賀臣聞太朴既謝日昏之迹已殊聖道不追王霸之風且

雜雖崇號廣溢遞享於尊名而德薄政衰不光於神器一作

氣伏惟越古金輪聖神皇帝陛下承大雲之法記應滎河

之寶錄以天上天下之尊為隆平太平之主不言而理三

階正而六氣調不怒而威萬寓清而百蠻服延富壽於和

平制雍熙於易簡懷恩慕化之黨候雨占風疇德瑞聖之

符非烟若霧青襟詠歎於庠塾黃髮謳吟於衢路固可使

堯舜擁篲禹湯扶轂踰賢劫而首唱邈梵天而高視豈登

三戒疑作咸五邁昔超今而已哉嘉號初登殊章備舉鋪帝

容而建皇極大寶重光撫乾軸而正坤維洪鑪再造仙渙

與祥風俱動湛恩將滂雷並作緩姬文之猷既削爰書錫

漢后之醑且頒戎級滂流之澤出九掖而浸群方抃躍之

音自三川而周四海加以崇祗肅於梵宇致嚴恭於清廟

申寬舉滯而有善必甄享德報功而無文咸秩規模粲而

洋溢道德紛而布護豈徒朝野稱慶觀美化之維新故亦

神祇降祥見鴻基之載末臣叨延龜組繆分虎符千年有
遇更逢開闢之初百辟相歡不預趨馳之末瞻雲路而式
作仰天庭而載佇踴躍之懷企聳無極不任鳧藻悅豫之
至謹遣某官奉表陳賀以聞

賀加天寶尊號表

李邕 天寶元年

臣邕言伏奉今日恩制萬方士庶九土軍戎昭洗宸波
光被聖渥臣誠歡誠喜載欣載躍頓首頓首死罪死罪臣
聞沐雨露者草樹有樂荷陶鈞者動植皆春故知則而象
之守而行之所謂則天之明立人之極有慶斯大無得而
名者也伏惟陛下尊崇聖祖肅恭道教子物天德序位代
工惣三五之妙勳統億兆之全業戈甲謐息華戎底平故

得真容慶應潛通帝夢寶符靈貺允叶神心加號所以發

祥郊天所以昭報大禮盛事光赫旬時作解周仁廓開宇

宙天稟類表稟稱雲紀變名風物光華再馳暉於日月河

山保界重賦質於乾坤同一氣之逮類表初與四時而浸

遠天長地久呼萬歲於太平國泰朝歡舞一作九韶於聖

主臣忝私守郡常荷載天空馳就日之誠未盡歌雲之慶

無任欣躍竦抃之至

賀冊尊號表 憲宗

韓愈 元和十四年

臣某言伏聞宰相公卿百官及關輔百姓者集作老等以

陛下功崇德鉅天成地平宜加號於殊常以昭示於來代

載陳情欵懇到再三陛下仰稽乾文集作符俯順人志乃以

新秋首序令月吉辰發揚鴻休膺受顯冊天人交慶日月揚光寰海之間含生之類抃歡踴躍以歌以舞誠歡誠喜頓首頓首臣聞體仁長人之謂元發而中節之謂和無所不通之謂聖妙筭無方之謂神經緯天地之謂文戡定禍亂之謂武先天不違之謂法天道濟天下之謂應道伏惟元和聖神文武法天應道皇帝陛下子育億兆視之如傷可謂體仁長人矣喜怒以類刑賞不差可謂發而中節矣明照無私幽隱畢達可謂無所不通矣發號出令雲行雨施可謂妙筭無方矣三光順軌草木遂長可謂經緯天地矣除剗寇盜宇縣清夷可謂戡定禍亂矣風雨以時祥瑞輻湊可謂先天而天不違矣國內無饑寒四夷皆朝貢可

謂道濟天下矣參羨備具名實具相當赫赫巍巍超今冠古方當講明堂璧雍之事撰太山梁父之儀搜三代之逸禮補百王之漏典時乘六龍肆覲東后微臣幸生聖代觸犯刑章假息海隅死亡無日瞻望宸極心魂飛揚有斥集作葉之非集作無自新之望曾不與鳥獸率舞蠻夷縱觀為此啣酸抱痛負集作耻且慙無任感恩戀闕懇逼徬徨之至謹奉表陳賀以聞

為河南盧尹賀上尊號表 武宗 李商隱 會昌五年

臣某言臣得本道進奏院狀知宰臣某等奉上尊號以光洪休耀列聖之睿圖表三宮之慈集作訓凡在生物孰不歡心臣某中賀臣聞善言天者必推功於廣覆善言日者必

詠德於大明然後物仰玄穹人知景耀皇王擬象今古同
規伏惟仁聖文武章天成功神德明道大孝皇帝陛下體
天垂蔭法日輪輝弘上德以纘戎啓下武而膺運頃從臨
御旋致治平雨順風調時推順適苗螟葉虫坐致消亡是
以銀甕石碑非煙浪井神而告瑞史不絕書且僊鬻爲災
周秦乏策金行火運不絕於侵陵瀚海陰山幾淪於約誓
而敢乘哀運來犯昌朝陛下乃赫以天威授之宏畧一伐
忿憤及晉陽逐帥代馬斤羈陛下又濬發宸襟委諸廟畫
浹辰而前軍就路逾月而元惡膏磔淨豐派之遺疆舉陶
唐之故俗最爾潞子復生葦童脫縲冀恩止柩拒詔擬九

折之險有五州之人藪澤逋逃糞土租稅陛下又遠揚神
斷深詔徂征合鎮魏之強藩出韓彭之銳將夷其巢窟去
彼根株清明王之舊宮復金橋之故地曾非曠歲集此丕
功固已至化潛融事光於玉板玄機獨運理溢於瑤編况
又志切希惟道存坤漠慕遺蹤於姑射載動堯心思順請
於崆峒欲勞軒拜遠惟集作揚聖祖載佇神孫俾異法皆祛
多門就掩麟殿正玄元之座鳳書招黃老之徒將以休有
萬齡臨茲兆衆使咸踐壽昌之域俱遊富庶之鄉巍乎煥
乎盛矣美矣故得人祗叶欲華夏均懷願加尊顯之稱以
報財成之美宰臣等果能陳大義允建鴻名伊尹暨湯咸
有一德咎繇謨禹克讚九功述盡善於玉猷標且美於帝

錄南山稱壽北辰降光末終一作無極之年長奉上清之
號臣幸丁昌運方守洛京空深戀闕之誠不在稱觴之列
舉頭見日雖悲千里之遙測管窺天且慶百生之幸無任
徘徊望闕蹈舞踴躍之至

賀新樂表 周武帝

庾信

臣等言臣聞天地順動則雷出為豫聖人功成則風行有
節故六德在咸池之官山谷可調八風入承雲之奏人神
不雜我太祖文皇帝體國經野設官分職變魏作周移風
正雅衣裳而朝萬國珪璧而會諸侯至如經綸圖籍校讐
煙燼樂正無缺章秩宗無廢典豈但商頌十篇得諸太師
之室虞書五禮取於恭王之宮伏惟皇帝以下武嗣興中

陽繼業運日月之明動淵泉之慮律歷著微無煩於太史
陰陽畧度躬定於天官故得參考八音研精六代封晉魏
為二王序殷周為三恪雖服朱干玉戚尚識典刑素鼓纁
裳猶因雄據未若山雲特起八卦成形鳳凰于飛九州觀
德改金奏於八列合天元於六舞聲含擊石更入登歌調
起初鐘還參玉管足以感天地而通神明康帝德而光玄
象昔者齋居玄扈為曲在於雲門師度盟津習舞歸于山
立遂乃包括三名克諧一代作者之謂聖天之所啓乎豈
惟路鼓靈鼗空桑孤竹廣矣大矣輪焉奐焉是知零陵孝
廉空傳玉管始平太守虛稱銅尺臣等並預鈞天同觀張
樂軒墀弘敞欄檻眺聽崇牙業業猛簾趙趙翠鳳揚旌靈

龜樹鼓杳宜雲霧湯薄丘陵醴泉與其露同飛赤馬與班
麟俱下聘魯請觀理當見其盛德適齊忘味定是知其盡
美昔淵魚聽曲尚得聳鱗櫪馬聞絃猶能仰秣臣等誠愧
知音敢忘悅豫若使詳其音律是所邈然但能記其鏗鏘
於茲爲幸不勝慶悅之誠謹詣朝堂奉表以聞

爲雍州父老賀鑾駕停幸洛邑表

高宗

李嶠

臣等某言伏奉今日日詔書鑾駕停幸洛邑臣等輕生多
幸淺識逢時青襟遊聖人之國白首觀太平之化常恐消
涘難效溝壑易期所以眷戀軒宇徘徊霄極日者農秋覽
缺庶政微勤天皇損上益下忘身循物便欲移鑾徙蹕望
河洛之封畿削賦蠲徭罷咸秦之力役匹等仰銘玄造退

愚心誠以天府膏腴帝畿殷實雖苗畝之務稍闕於千
箱而衣食所資尚豐於累載况惇嫫賜給家室乂安何容
使宸座鳴謙聖躬服劬勞之事衡門高枕臣等家過差之
澤是用低徊跼蹐抒抽慙惶方且選議蓬茨推中襟於白
屋因言槐棘外下情於紫路不謂乾心俯應聖德潛融降
六璽而紆紱迴三光而改照人欲天從既通誠感稟靈含
氣疇非慶躍竊惟政途非一朝務有恒國彝不可以思
廢家征不可以事闕皇天愛精願燾谷兆庶之歡心臣等
畢力窮年供黍稷之餘稅庶得百度無曠九功惟叙伏望
皇明乃睠輿輦少安則海甸蒸人撫耕鑿而知勉涓濱遺
老仰雲天而識庇無任踴躍之至

文苑英華 卷之五百九十九
為何舍人賀梁王處見御書雜文表 前人

臣彥先等言臣於梁王三思處見御書雜文尺牘凡九十
卷跪發殄藏肅承瑤檢天文景鑠壁合而珠連聖理雲迴
鸞驚而鳳集究黃軒鳥跡之巧殫紫府結空之勢偃波垂
露會寶意而成一作新半魄全曦象天形而得妙固已奇
蹤絕俗美態入神掩八體而摠規模冠千齡而垂楷法重
以語成四教文摠六詩聲咀微而含宮旨懲違而動疑作
德用之於國敦風俗而厚人倫行之於家習雍和而崇孝
敬惟彼良翰特蒙殊獎銘厚渥而歡悚竭深誠而奉戴是
用編之玉軸勒以銀繩盡罄梁珠特裝瑋瑁之匣惣攻一作
我陶壁用飾瑤璃之荀彫鏤千品緹巾萬襲芸香却霧芝

體為封珍寶之精下燭西堂比之岫文章之氣上纏東壁之
象實可謂天下之妙迹域中之奇觀者焉臣等幸遇休明
叨近簪笏駭囑非常之瑞欣逢不世之寶足蹈手舞徒懷
鑽仰之心夕死朝聞豈識名言之地無任抃躍歡忻之至
謹奉表陳賀以聞

為常右相賀拜洛表 武后 垂拱四年

臣某等言伏奉五月九日制書將拜圖溫洛肅事南郊御
朝堂列群后恭聞大禮不勝慶躍臣某中微臣泛覽金冊
詳窺玉板商較於七十二代下上一作於數百千年以義
軒稱皇所貴者河圖龍出以堯舜稱帝所尊者洛書龜負
猶未聞總集靈命弘敷聖業籠大勛於萬古盡能事於一

朝非天下之至神其孰能與此乎伏惟皇太后陛下肅膺
遺托光踐丕基皇業高於補天母德隆於配地東西浹洽
窮八制而流河海南北貞明洞六幽而懸日月淹中訪禮
汶上披圖情每番於布政義不忘於宗祀於是全謀聖造
異制神行迎四象而疏圖向八風而闢牖上圓法天而煙
雲為之動色下方象地而龜玉所以呈姿玄功獻範洋溢
於歌頌秘采靈文昭彰於篆刻豈白雲青玉唯傳地理之
經黃魚黑鳥但播一作天乙之號可以答上玄之命可以
光累聖之隆制有司一作法駕用禋柴之典採沉璧之儀然
後負黼裳而朝百禋聖衣裳而會萬國不亦休哉不亦盛
哉臣忝預出征恨深留滯河西弔影啣珠之託未申洛北

馳心拊石之歡何極不任悚懼之至

賀納諫表 代宗

常袞

臣某言伏以補闕姚南仲和仕幹等上封事恩命特與改
官及進階兼賜章服又內常侍吳承倩奉聖旨令兩省供
奉官數論得失無有隱諱者德音霈然公謹知勸群情震
喜中朝動色易曰感人心而天下和平今之所感可謂深
矣臣謬當丞弼之任不能有所啓聞踧踖自慙惶汗失次
然以聖德之弘納天聽之宏博欣奉踴躍不勝大慶中賀臣
聞從諫則聖帝之德也有犯無隱臣之分也故上聞逆耳
之忤受而不疑下有殺身之益死而無悔禮曰天子齋戒
受諫又曰近而不諫則尸利帝道莫盛於有虞書之美舜

則曰嘉言罔攸伏萬邦咸寧王道莫過於有周詩之頌文
則曰思皇多士惟周之禎漢家雜之以羈亦詳延極諫訪
求得失國朝稽合皇道肇脩人紀貞觀故事布政典章危
言正論聞於天下陛下以欽明御曆紹休祖業仁聖廣大
天覆地容求賢進善有不及每覽群臣奏議日旰忘勞
穆然嘉納不令夙退順顏者必遠忤旨者必容而芻蕘之
可擇庶黎藿之兼採少有所補從之如流雖委輅論都即
日西行伏車頓首路迴乘輿方之於今未云其速而又渙
發宸旨宣導近臣直言者賞之於朝罷奏者責其所職以
明沮勸大悅人心則太平雍熙之化溥將四表矣可以動
天地可以服一作伏戎夷雖上古至理納諫達聰坦然不驚

未觀今日之盛也望請宣付史官光垂帝錄臣職任潤色
敢揚鴻休無任欣躍之至

為秋官員外郎李敬仁賀聖躬新牙更生表 武后

李嶠

臣敬仁言昨因奉事蒙恩入對伏見陛下所御湛露殿三
間兩間雨漏無所修葺又因顧問之次伏承聖旨云去年
口中生一齒今年又生一齒臣伏以聖德謙冲躬自菲薄
富有四海尊居萬乘而中堂外扉不閱一作關於寒暑上棟
下宇未離於燥温降紫宸而齊白屋屈帝力而用氓心雖
昔之采椽土階茅茨蒿柱漢皇之儉用夏后之卑宮六籍
之所讚揚百家之所記述曷足以希風上聖仰帝道之崇

高擁慧後塵望皇與之軌躅臣又聞之易有四營金牙爲
壽考之象詩有六義玉齒載神仙之謠還年而繡貝不虧
却老而瓠犀仍出亦有堅而不脫聞於道養之方落而更
生得自靈飛之散斯並道藏幽記術隱上情誠福力之所
招匪勤求而可致陛下端莊靜默寬惠仁慈抑嗜欲而省
煩勞恤饑寒而其弊陋宜其延貺宗社受報黎元集天地
之休和享靈祇之介祉故得百祥護體五福登年同鎬邑
之慶齡邁鑪宮之錫壽豈徒一人有慶常居北極之尊實
乃萬姓同歡共仰南山之固臣謬以庸賤獲奉宸嚴欣聖
壽之延長願稱大慶見宸居之挹損思揚至德乞宣示海
內仍錄付史官庶使六合之中知寶筭之方永百代之後

頌休風而不絕無任抃躍之至謹詣闕奉表陳賀以聞

賀聖躬痊復表

代宗

常袞

臣某言臣親一作見奉聖旨伏承御膳過時微似煩熱臣等

退用兢悸不安寢興齋居潔誠思獲休問適中使吳承倩
至奉宣德音今已校退卿等不須憂者恭承睿旨俯協歡
心欣抃失容蹈舞不足伏以陛下裁成二氣聽斷萬方每
積憂勞載勤早曠一作宵旰所以祈人命上黷聖躬責在微
臣退增兢懼今溽暑過候涼秋戒期方助穆清上滌玄慮
伏惟簡臨庶政保合太和以答天地穰穰之福以慰臣子
顛顛之望天下幸甚無任喜慶踴躍之至

同前

于公異

臣某言今月十七日衙官吏萬項奏事廻伏奉手詔伏審
聖躬頃暫乖理今悉康平凡在臣子不勝抃躍中伏惟皇

帝陛下自天生德昭聖垂衣類表運啓握符已慶無疆之

壽疾稱勿藥果從有喜之辭歡初洽於朝廷慶旋周於海

內臣伏以天心恭順庶政殷繁既當痊愈之初宜加順攝

之道然猶日旰對奏未明求衣理或至於憂勤事終干於

思慮恐乖將候竊未遑寧伏乞朝廷之宜付之宰相代討

之任仗被戎臣從容聖心消息玄化爲宗社自愛委諸有

司幸甚幸甚臣蒙國寵榮輒露誠懇伏惟察納表臣愚衷

同前

前人

臣某言今月七日中使至進伏奉勅書手詔慰諭臣者伏

以聖躬頃乖願攝少有不安景福無疆旋以康泰屏營奉

詔且喜且驚臣聞子之事親出告反面臣之事主移孝爲

忠君親之間其體無異自宜問安內豎增憂寢門平君之

時猶無闕禮乖理之後豈合遑寧又臣聞勤則近憂憂則

生疾豈陛下以萬方黎庶尚未和平三輔甲兵猶從征討

此皆臣下之過遂煩君上之懷臣特荷國恩超踰儕輩死

生不係於已命休戚實同於國家况聖壽日躋皇符永固

雖禎祥合慶祚必壽於南山臣子馳誠心豈離於北闕類表

作伏以聖謀思振徽徽正安輕騎無信宿之程郵館無燕

金之費臣欲旬日之內輕行入朝陪列庶官恭承睿旨審

聖質之安否布微臣之款誠伏乞矜允遂臣愚貌

賀聖體平復御紫宸殿受朝賀表 元稹

臣某言今日得上都進奏官報稱昨日陛下御紫宸殿受
群臣賀表伏審聖躬萬福親見百寮率土皆歡溥天同慶
臣某^中賀臣聞西曜有明晦所以成其不已四瀆有盈縮所
以成其不竭不有燎火無以辨玉質不有霜霰無以驗松
心是以軒轅神仙然後慶華胥之遊秦穆疾寢然後享鈞
天之樂堯以癰瘡而為聖禹以胼胝而稱功斯皆因疾成
妍以勞逢福非臣臆度敢進瞽言昨者聖體不安繞經旬
日穆不卜吉勿藥有喜此所以表北極而長尊配南山而
永固者也况日臨黃道萬物皆榮帝御紫宸千官畢賀臣
恨以守符外郡不獲稱慶明庭空懷鼓舞之心莫備慶歌

之末臣某無任跳躍徘徊瞻望歡欣之至謹差知衙官劉
宗奉表陳賀以聞

代安平公華州賀聖躬痊復表 文宗 李商隱

臣某言今月某日得本道進奏院報以聖躬痊和右僕射
平章事臣涯等奉見聖躬訖社稷殊祥生靈大慶臣忝分
朝寄四奉國恩無任抃舞踴躍之至臣聞天普覆也應運
而健若龍行日至明焉有時而氣如虹貫伏惟皇帝陛下
道超普覆跡邁至明思社稷^{集作}之靈惟德是輔念蒸黎
至廣以位為憂求衣未明觀書一夜壽域既勤於躋俗大
庭微闕於怡神是以自北陸送寒暫停禹會及東郊迎氣
爰復堯容四海方來百辟咸在六幽雷動萬壽山呼惟臣

獨以一麾載離雙闕犬馬之微誠空切駕鴻之舊列難階
提郡印而通霄九驚對使符而一食三起今幸以俗臻富
庶年比順成伏惟稍簡萬幾以迎百福託燮調於彼相責
綏撫於列藩承九廟之降祥副兆人之允望臣某不勝悽
悽慙慙之至謹差某奉表陳賀以聞

文苑英華卷第五百六十九

文苑英華卷第五百七十

表十八

雜賀

為宰相賀趙郡鑄天尊及佛有諸瑞表一首

為宰相賀開元寺鑄釋迦牟尼佛有白光等瑞表一

首

為宰相賀宮人夢玄元皇帝應見表一首

賀新殿鐘鳴表一首 賀感夢聖祖表一首

百官賀佛放光表一首

百官賀朔旦冬至表一首

為汝南公賀元日御正殿受賀表一首

為大衍曆表一首 賀示曆書表一首

代百僚賀放浙西租賦表一首

為杜相公賀恩賜淮西粟帛表一首

中書門下賀抑情復膳表一首

代李侍郎賀德政表一首

為宰相賀趙郡鑄天尊及佛有諸瑞表

玄宗

孫逖

臣等伏見趙郡奏鑄等身元始天尊其日天氣晴和祥雲散彩又開模未畢先出白光尊容漸見豪光圓滿其花冠耀白色如玉遍身衣帔自然雲霞眉上有兩點白光流轉照耀又鑄等身釋迦牟尼佛螺髻兼遍身自然玉色唯頂至面為紫金色聖情敦道天心護法爰降宸儀將崇寶相鑄寫之際禎祥屢臻初法止

一作

於上京遂呈祥於外郡

金姿玉色不假琢磨霞帔密元裳非因藻繪見祥光於眉宇生瑞氣於雲端曲示明徵宛如合契玄貺稠疊用彰萬億之期蒼生何幸盡登仁壽之域臣等忝奉一作侍軒墀倍深欣慶無任抃躍之至謹奉表陳賀以聞仍望宣示朝廷編諸簡冊

為宰相賀開元寺鑄釋迦牟尼佛白光等瑞表

玄宗

前人

臣等伏見開元寺所鑄釋迦牟尼佛身現金色頂含白光綵濃紫於聖容散純黃於佛體未加瑩飭已成相好殊祥異應昔所未聞伏以聖人為心玄妙莫測至誠所感靈變無方陛下子育群生弘脩正教寫真容於法界傳寶相於

恒沙洎崇建以來禎祥

符一作

畢集自有神通之助豈資人

妙之功超絕瑞於千古表昌期於萬邦凡曰士庶不勝慶

幸况於臣等倍切常情無任抃悅之至謹奉表陳賀以聞

為宰相賀宮人夢玄元皇帝應見表

玄宗

前人

臣等昨因奏事親承德音宮中有一婦人性頗好道然未
全通悟數日已前忽夢玄元皇帝慇懃教誡道法尚未盡
解遵承無何又依前夢見大被呵責遂以水噴其兩目因
而喪明比覺後都無所見然始責躬罪已情祈至真又夢
玄元皇帝教之曰汝可見吾孫自立愈其婦人曰不知吾
孫是何人曰汝皇帝是也汝至西時可見當施其法使汝
知驗至時宮中教人共扶見朕朕口向索誠作道法使救療

其目須臾自開平復如舊聖相一靈感昭然合符與卿等同

慶者伏以混成莫測玄元闡其教衆妙難名陛下光其業

二聖表德千古叶符將告天休遂憑宮女乘恍惚而為夢

在希微而有聲不因其言孰報貽孫之慶不開其目何彰

救物之慈法事既陳靈徵果驗能使病者復歸其明當聖

躬本命之時合烈祖玄通之契事且符於乂視理仍叶於

常存殊尤之祥載籍未有臣忝跡樞近親奉德音慶悅之

情實倍恒品無任抃躍之至謹奉表陳賀以聞

賀新殿鍾鳴表

玄宗

李邕

臣邕等言伏見昨宣示於新殿為萬姓祈禱神鍾自鳴是
知聖作昇聞天意下降道開皇極潤及生人臣等

中賀臣聞

光覆動植者莫如天臨照幽遐者莫如日自非齊聖妙用
曷以則而象之玄化至德曷以感而通之伏惟陛下道心
坤叶神教昭宣以四海為家萬人為子常恐水旱遞有干
戈斲勞所以供祀百神用祈五福德澤被物聖靈動天睿
情注於一時景鍾鳴於別殿夫眾者萬有也廣者四維也
今陛下物萬有一四維潛運方寸之間克塞宇宙之外則
何聖不鑒何神不昭豈唯一鍾乎况南面之位屈陛下之
至尊西方之金格陛下之本命非無情之應是有由而來
自然群龍扶持九天欣戴保億兆之元后登千萬之末年
時觀雍熙代偕一作階仁壽此天所以告鍾所以鳴臣等幸
朝上京欣遭大慶一舞一蹈未極臣子之心再詠再歌徒

知天地之德無任抃躍之至

賀感夢聖祖表 玄宗

前人

臣竊言伏奉今日日制書至德感神通夢聖祖一作聖祖告

以莫大之福示以無疆之期上賀國觀下敷人願以抃以

躍且舞且歌臣某中賀臣聞百川所歸者謂之大海萬有所

仰者謂之聖人今四海獲安聖人致壽臣子之願允塞乾

坤之應克諧粵自書籍以來感慶之深福祐之盛未有如

斯者也伏惟陛下道用御天德心下物事無事以集休明

至明以玄悟人天乃接福脫爰臻故得真仙見靈異相昭

應言皆合天心證非外將恢弘聖慮照自宸衷啓之大年

授以元祐麻姑觀海歷歲彌長王母記桃與時無準則幽

文苑英華 卷之五
明所載宗廟所鍾兆庶子孫百靈齊集知億年之永託沐
萬代之延休草樹自榮魚鼈咸若五風異色四氣同和鼓
天地之大鑪鑄邦家之鴻業八極猶小不足受其禎符萬
物每輕不足答其成造卹獄宥死符以再生寵賢達人宴
以旬日耆艾衢陌工賈旗亭高興太平之時歡言上古之
化撫家族以自慰詣州邑以相誇官不驕人人不畏吏識
天之覆熙焉如春惟聖之慈陶然如醉無任抃躍慶喜之
極謹附表陳賀以聞臣等誠歡誠喜頓首頓首

百官賀佛放光表

常袞

臣等言今日董秀奉宣文成殿御功德佛放光明六宮及
諸王公主近侍等並觀其光以從三更四點直至四更猶

在臣聞明主之理本以庇人大聖之教先於及物合若符
契感而遂通伏惟陛下以道法天以心證佛指六合於無
事納群生於慶聞薰然慈心在宥天下滌慮恭默齊於穆
清以四海之尊勤三乘之法故得大雅應見變化無方毫
光破昏金殿如畫照恒星而奪彩混圓魄而一色曠代之
瑞天人咸覩玉漏將盡銀河以低仰光明而無際知皇劫
之彌遠臣等謬忝樞近倍萬恒情無任慶抃之至

百官賀朔旦冬至表

許敬宗

貞觀十
四年

臣聞乾坤資始上元開曆象之端日月還流朔旦正旋衡
之本事韞有形之表理遂無物之先故能運彼玄樞財成
庶類麗茲黃道孕育群生惟聖則天允執在躬之曆惟皇

作極必叶履端之契所以書稱敬受易曰明時克正降平
無非此道伏惟皇帝陛下聲疑祕錄功弘造化縱如神之
玄覽體不言於四海發就日之光華同無私於七曜階奠
循畧阿鳳吟辰元精究開闢之初握先窮名數之始裁炎
涼於玉管節雨露於金渾道格彼蒼仁霑無外八絃受朔
盡入封疆九譯承風遠遵文軌昆蟲涵於凱澤草木洸於
榮光由是上感天而下滿泉不愛道而効其寶肇一元於
甲子致希世之貞符挾五始於長至播光前之茂禮伏見
宣義郎李淳風表稱竊見古曆分日起於子半勘得今歲
十一月甲子朔旦冬至而故太使令傳仁均欲苟異張曹
玄法減餘稍多子初爲朔遂差三刻用乖天正然自初及

日月全未相離筭與太初事皆符合奉勅付有司及經
術者詳加考定以議奏聞於是鴻生碩儒咸稽茂典研精
覃思俱考舊文國子祭酒臣孔穎達十有一人與尚書八
座叅議得失咸以爲仁均定朔事有微差淳風推校理尤
精密謹按漢書云古者黃帝合而不死應邵云曆合天心
而得僊也又按益部耆舊傳云洛下閎改顓頊法更作太
初曆自云後八百歲此曆差一日有聖人出定之斯乃差
日濫觴久著之於冥兆聖出之驗叶當今之有徵俯會八
百之期遠叶九仙之道臣等緬惟邃古曆考前王若乃萌
氣黃鍾兆根玄乳闡其幽而藏其用窺其奧而開其文列
聖存而不論故無得而稱也自圖書爰始三統騰鏡皇王

以來六家分軫帝軒垂憲大撓泪其洪源伯禹嗣興小正窮其至願命羲叔於唐曆考箕子於周年或以亥乙司分翠虬定箭登清臺而索隱揆圭表以知微事緒多途無聞感應猶且各稱書契並擅鴻名改年號以應元符禮日觀而為稱首豈與夫兩儀同德五緯齊明景延南正星經北流聯珠候朔的皦清漢之間合璧規天徘徊紫霄之上校先代之優劣豈同年而語哉庶當玉輅徐輪金泥祕檢塗山之下會百神而合符介丘之側朝萬玉而光輝天人交際不亦休歟臣等生屬壽昌累逢祉福至於今慶曠古無儔何幸如之親承旦暮不任欣躍之至

為汝南公賀元日御正殿受朝賀表

臣某言臣得州本進奏院狀稱報元日皇帝陛下御含元殿受朝賀者上正三辰下臨萬國事雖舉舊命則惟新

賀中

臣聞聖祖垂訓王者處域中之尊公羊紀時春者為一歲之始載稽政實抑有典章近歲以來此禮多闕或事因惜費或時屬告休伏惟皇帝陛下道被無垠政敷有截全取發生之德無非訢合之仁蒼旻降符黃輿告瑞石碑既見文作太平銀甕旋臻字成萬歲而又愛勤不輟克責方深精誠旁照於八絃懇惻上通於九廟仙厨撤味獸館休畋遂使化妖宿為壽星變小戎為餓殍慶由聖感令屬神行爰在新正式脩闕典彤庭列位丹陛陳儀凝旒而天啓其門服袞而日升於觀巽風發越允澤滂沱左右賢臣駿奔

王定

多士國無諛佞擢靈草而不採朝絕奸邪儼神羊而莫動
禮成而退物有其容一作况以光耀瑤圖丹青王版
輝前映後邁五登三臣竊訪一作儒遠徵舊典帝堯華封之
祝唯止匹夫神禹塗山之儀口且非元會然猶堯有多憂之
戒禹存一作行後至之誅在和而尚乖孰歡呼之可致豈
與茲日而得同年臣方守河湮正分符竹不獲躬陳玉帛
首率粉航况又嘗以藝文叨一作君禁密雖遠離天上猶近關
西抃賀空深就望無所心馳一作紫闕非夢寐而不通魂繞皇
闈羨歸飛而莫及無任賀恩一作祝壽戀闕屏營之至

賀大衍曆表

玄宗

張說

臣說言伏以開元大衍曆天

旨裁其紀綱日官考其精要

獲端更始敬授惟新加以辨

五行之序推七精之數明微

聖期實光土德臣又見梁天

監中陶弘景著玉匱記云盛

德木予以肇來運頃者僧一

行推璿衡曆得皇家天命成

數千年古今祥兆若合符契

曆數既在於聖躬卜年仍表

於長曆莫大之慶獨冠前王

出忝跡儒林預聞昌運無任

抃躍之至謹奉表陳賀以聞

賀示曆書表

玄宗

前人

臣某等言內侍尹鳳翔至奉口且聖音內出新撰曆書二十
五卷以示臣等竊窺深奧仰觀英華涉海登山罔知攸際
臣聞唐堯光宅順昊天而定四時虞舜登庸在璿衡而齊
七政伏惟開元聖文神皇帝陛下至德廣運文明睿哲道

冠生知與神合契備往聖之能事紹昔王之闕典發揮易象以應乘乾之時考正曆書更表履端之始上色二帝下括三王徵畧運之盈虛究推步之踈密備稽氣象載纏坎離一作載離三辰順軌而更明五緯合度而增煥是使天地貞觀神人允諧唐虞舊章於斯重覩臣等幸陪書府得預朝門抃躍之情實萬恒品表陳賀以聞

代百寮賀放浙西租賦表

呂溫

臣聞等言伏見今月十五日制命以天下經賦首於東南浙右諸州荐罹災歉全以逋債大敷湛恩人誼勃興朝聽震動中賀臣聞三王已降綿曠千祀為邦之政盡在欲理之主甚衆莫不知傳戒獨豐語稱與足至於愛人節用之際

約躬紆國之時則必情隨事遷以欲忘道故曰人鮮克舉行之惟難伏惟皇帝陛下濬發睿圖紹休聖緒躬行慈儉予育困窮皇明燭幽惠訓不倦撫臨萬國會未再周深求疾苦之源屢下蠲除之詔裁戎祀之經費減乘輿之服御雖邦計之有羨入憂於未憂雖生人之所樂輸損之又損風行號令日貫精誠明神聽其德音和氣生於文字將舟車所及咸升至理之期豈江湖下方獨被曲成之澤臣等尸素有日獻納無聞尚勞聖心軫恤人隱其同凡品不敢望於清光竊與疲疇共謝生於玄造無任感抃之至

為杜相公賀恩賜淮西粟帛表 符載

臣某言今月某日使某官至伏知聖旨賜淮西節度使吳

少誠米若干石鹽若干石絹若干疋雨露之潤忽沾於焦
旱生育之德忽被於饑寒凡在臣庶孰不慶幸臣某誠歡
誠喜頓首頓首日者少誠迷誤與兵淮蔡陛下開日月之
耀霽雷震之威洗其瑕穢復賜珪爵使螻蟻重安於窟穴
草木再浹於恩光大忠一作義易克邪之心和平銷悖亂之
氣今復恤其歉儉賜之粟帛聖澤灑危疑之地皇慈周及
側之人合救時之宜塞未萌之釁微禽食楫尚懷好音萬
夫載恩豈不知感此所謂睿圖宏遠神武深沉善戰於仁
施之中伐謀於茫昧之際武何戈而不止物何化而不從
增七德之輝華動八絃之踴躍臣叨居將相職守藩維不
獲奔走稱慶宮闕無任歡抃懇款之至謹奉表陳賀以聞

中書門下賀抑情復膳表

裳衮

臣某等言中使吳承倩至奉宣進止以臣等所奏華陽公
主初薨聖慈深悼抑情復膳保御至和伏惟類表陛下初
以愛主幼冲純性聰敏類表恩念之厚有過於成人疾病
之憂非止於一日早齡遽失流痛兼哀臣等不安下情惶
燭上請微誠感達蒙降德音而不以至憂類作之私忘於
所寶之重推必然於大分割無益以遣懷用復常禮以勤
庶政致此陛下齊親踈於一致和福壽類作表於萬邦契
睿類作聖類作祖玄元之符實天下蒼生之福臣等累日兢怖焦
心失圖承命釋憂倍百慰幸無任感悅之至謹奉表陳賀
以聞

代李侍郎賀德政表

德宗

呂溫

臣某言臣聞上蒼垂象當分野者先知元后用心奉職司

者方見是以堯稱光被四岳得於疇咨舜號文明九官稟

其集作於分命豈非隨方表志因事立言陳力自參於化源

造膝難迷於日用伏惟皇帝陛下睿圖濬發玄德廣運恢

纂鴻緒允升大猷振十聖之遺休復百王之墜典至如崇

陵盡瘁率禮無違長信歸尊因心則感內成則仁叙九族

外平則義協萬邦厚俗則罷及高年廣孝則榮加錫類能

刑則朝無隱隱善任則野不遺才修文則戎蠻來威集作王

整武則南北繼捷此皆事懸集作光日月聲洽寰區黔首之

所謳歌縉紳之所抃蹈集作歡其或機參造物意兆先天事

隔於人謠功隱於朝聽者若非奉職之臣官業所及諒無

得而稱焉臣以庸劣謬膺寄任調盈虛而馭輕重關成敗

而繫安危職思其憂夕惕若厲每因整率披竭愚衷集作忠

出奉溫顏累承睿旨有以知造化之意有以見天地之心

曠若發蒙折一作浙如愈疾管窺所至可得而言昨者臣以

潮州刺史李璿放縱私鹽耗散公利請從免職以儆慢官

陛下以為法令改更且一作宜當申論道塗悠遠容或未知

俾為後圖用緩前責弘恕包於廣大明察貫於精微此則

群臣不可望清光者一也江南西道觀察使楊憑奏以支

郡旱歉經賦不充請征居地之羨且循稅茶之法陛下以

天災流行以時而息人怨滯結貽患則深縱無日新之美

忍復已除之弊特令寢奏姑務通商有司知畫一之方負
販有昭蘇之望此又群臣不可望清光者二也臣嘗使推

官殿中侍御史崔太素奉使淮南臣以太素二字集作其名秩

甚卑濬决務重徵令郡縣釐集作整訓役徒頃示等威請賜

章服陛下以為職任伊始勤効未成必有可觀乃申後命

臣再陳所切方可其奏雖事從權與且濟物之宜而賞不

僭行已見求圖之旨此又群臣不可望清光者三也臣對

敷之日親奉德音知臣使司支計闕少必擬昭明儉德振

起素風率身為天下之節用自中宮而始又曰集作云臺殿

舊制已當惕慮經營改作非所措懷將不崇三尺之階豈

復議十家之產發自宸念形于天顏意開而河海自清言

出而神祇知感此又群臣不可望清光者四也陛下光臨

大寶星歲將周貴戚之賜與無聞恩倖之霑霈殆絕至於

贍軍供國行賞報功則必鴻毛府庫糞土金玉遂使夏州

諸將恨効淺而恩深劍外三軍知生輕而義重此又群臣

不可望清光者五也夫唐虞盛烈文武餘風莫不傳詩聲

詩布在方冊且匹夫匹婦片善必書飛羽沉鱗一样皆紀

况陛下動關教化言在政刑理參至道之精躬行盛德之

事而冲虛謙讓鬱而未發將何以光揚藝祖昭示後昆伏

請宣付史官求為大法臣幸蒙恩遇獲奉昌期言必親聞

事皆目覩分深骨髓義激血誠輕黷宸嚴魂宇集作首飛越

無任屏營之至

文苑英華卷第五百七十



Vertical columns of text in a traditional Chinese woodblock print style, arranged in a grid. The text is mostly illegible due to fading and the watermark.

